

# **Hahatakei Haeu**

## **Waliko tuah ti Haeu kola hatakei hani Jon tel aposel**

### **Kakain ti haxewai meng ti he teik pepa ie**

Jon tel aposel tai teik pepa ie sai ahang 65 muhin ti Jises moih aliawa ape Haeu waxi i hani tesol tonan. Lokon ien laha to aile hahalalu teka kahikahi Krais nake ti xoxoi namilolato ti Jises Krais tel Masiwi ti lato. Teka ti lato, wawahen ti lato wawakulewa ape kumahe lato usiusi saun tenen ti Jises hahanau. Jon to hahakui lato ma pahan lato hani hatapo Haeu tupualato. Jon kakaxi waliko tenen hahataxin pate tuah ma pate lalap ti Haeu hatakei hani i. I kola ka kilan waliko lialun po sohot he tehu pon ie ma puase Satan i to lap aheahele. Tuahe Haeu hapuasa Jises Krais ti xoini hatapoi hatesol teka laha to papahoxai i ma tin i kahui hasolia teteka laha hong soh tetan. Ape laha to kapin lian tehue. Kalak pate kuewen wanen ti Jon tai teik pepa ie, tin i hanau hetekie kaha teka ti aope waliko ti Haeu namiloiwen i sohot hani seilon. Kako teka seilon ti Haeu lawe pakata kapitawa kali Jises Krais ma tu xoxoa kalak na kawatan tenen tenen tunahi kako. Kako kum aka lilioi wanen xoxoi namilokako tetan. Pake puki Haeu huhuali kako ape tap tahi maluhei teteka laha hana hatapo namilolaha hani i. Kako lawe nameni hawanewa ka Jises Krais se tel Masiwi pate pohen, tetel i xoini hatapo lawe waliko lialun.

### *Hutuan*

<sup>1</sup> Haeu hatakei hani Jises Krais waliko ti he teik pepa ie lehe i kola hani teka laha soh tetan waliko ti lehe i sohot. Aile ape i talo tel engelaun kola haniak nga Jon, tel unauan.

<sup>2</sup> Ape nga kakaxi hatesol waliko ti nga ningahi-wen. Tesol waliko ien salan kakai Haeu kola haniakako sale Jises Krais.

<sup>3</sup> Haeu aile hasolia hani teka laha ridai ma hong auni tesol kakain i ahuma tetan ti nga tatai ie nake taun ti sohotui tesol waliko ie ape i xohiwen.

### *Amuam ti Jon haniwa teka kahikahi Jises ti tepanim huohu taon*

<sup>4</sup> Nga tai hahani teka kahikahi Jises Krais laha leili tepanim huohu taon ti texux xux Asia.

Nga kamei Haeu, Holi Spirit ma Jises Krais kola haniamuto lalape soliaialato ma hatona hasoliai tiamuto. Haeu hoi liai ti imat, aope ma tin i luluainima tutuen ma Holi Spirit liai lawe kapin, tetel neiniai lawe waliko.

<sup>5</sup> Jises Krais i tetel Haeu hamoihamu imat. Waliko ti i kakak sale Haeu mewenae salan ma i tin pamu masiwian ti lawe masiwi ti tehu pon ie.

Jises Krais waheni hawane kaha ape i mat ti awaiakaha ti kawatan ti lialui woukaha.

<sup>6</sup> I aile ape kako sohot seilon ti hahitake nenein tetan, teteka ti lawe kako aile waliko ti Haeu tel Taman kilami haniwen kako. Aweisalukako hani Haeu mewenae hean. Kako haxawawa axe Jises Krais lian tehue, tetel pohen hetekie soliaian pate lalap. Salan wanen.

<sup>7</sup> Hongoa! I luama he maun  
ape hatesol seilon ningahi i

hetekie tataen teka teleian.  
 Tataen ien seilon ti lawe xux tang hawane  
 nake ti lialui woulaha.  
 Salan wanen.

<sup>8</sup> Haeu tel Masiwi ukek, “Nga se Alfa ma Omega, tetel ti hutuiai ma tiliai lawe waliko. Nga hoi liai ti imat, aope ma tin nga luluainima tutuen. Nga tel poh tapein.”

### *Holi Spirit hanamiloa Jon ti ningahiae Jises Krais*

<sup>9</sup> Nga Jon tel akikimuto ti Krais, nga tel tuau-muto ti ailei puase Haeu hahitake nenein tetan. Tin masin amuto, nga kau lungei tatale kawatan nake nga kahikahi Jises Krais. Laha hakau xaxaweni nga hani texux xux kokol axan Patmos nake nga kaxi ahuti kakai Haeu ma lawe waliko tenen salan ti puase Jises.

<sup>10</sup> Tehu ngain ti kako teka kahikahi Krais nameni xahatai Jises, Holi Spirit hanamiloa nga ape nga hong lalape kinax tenen masin tangiae suhusuh i wixima sai tehitok.

<sup>11</sup> I ukek, “Waliko ti ape o ningahi, tai konginiwa ape hakau haniwa teka kahikahi Krais leili tepanim huohu taon ie: Epesus, Simirna, Pergamum, Tiatira, Sadis, Piladelpia ma Laodisia.”

<sup>12</sup> Nga towiahu paxai ape nga ningahi tepanim huohu tutuhi lul ani gol.

<sup>13</sup> Wasolalato tel seilon i pupuxui tehu puxux weluwelun, teik tah gol he patanawan. Tanoman masin ka i tel Nati Seilon.

<sup>14</sup> Patun ma ukun paxaxuan ole olawik ma poke mau. A pulan i kamakam hanowi xekei ah.

<sup>15</sup> Titi aen talepalep hanowi samen tenen laha lui hauniwen. Kinaxon masin tonui tainiai mau lalap.

<sup>16</sup> I akekeni tepanim huohu kohot he tepaun minan manau ma tea ngol hahupaun angian sohotuma he awan. A kawan i kamakam hanowi alon ti lalape ngain.

<sup>17</sup> Ti nga paxaiwa i, nga haputa lioi nga hani he titi aen masin tel seilon maten. Tuahé i hana tepaun minan manau patul tetak ape i ukek, “Kum maamata. Nga tetel ti hutuiai ma tiliai lawe waliko.

<sup>18</sup> Nga tetel lawe moihin. Nga matewen tuahé nga ape moihin lian tehue. Nga tel masiwi ti akeniai matemate ma ti teka laha matewen.

<sup>19</sup> “Aile ape tai konginiwa waliko ti o papaxai, waliko ti i sosohot aope ma i po sohot imuh.

<sup>20</sup> Tesol tepanim huohu tutuhi lul ani gol o ningahiwen, i kikilami teka kahikahi Krais leili tepanim huohu taon ape tesol tepanim huohu kohot he tepaun minak manau i kikilami tesol engel lato ngangahati teka kahikahi Krais ien.”

## 2

### *Kakain hani teka kahikahi Krais ti Epesus*

<sup>1</sup> Ape imuh i kakane nga ukek, “Tai haniwa tel engel ngahatiai teka kahikahik ti Epesus kewak. Ie se kakai tetel i akekeni tepanim huohu kohot he minan manau ma i tau nanahih wasole tesol tepanim huohu tutuhi lul ani gol.

<sup>2</sup> “Nga tioi waliko ti amuto ailele. Nga paxai tioi lalape puasamuto ti amuto to aile kakaptini kalak kawatan tenen tenen tutunahi amuto. Nga tioi amuto kum tua paxai lioi saun lialun ti

seilon ma amuto tohongi paxai teka laha ukek laha aposel ti Krais ape amuto upia tunahiwen ka laha tuahe woinakon.

<sup>3</sup> Saka amuto kau lungei tatale kawatan tenen tenen ti seilon hani amuto nake amuto kahikahik. Saka amuto kum aka lioi puasamuto.

<sup>4</sup> “Tuahe hina waliko nga kum amuke wasolamuto. Wawahen ti amuto hani nga kumahe xoxoaian ti imat.

<sup>5</sup> Namiloi kapitiniwa xoxoi wawahen ti amuto ti ape i wakulewen. Sohiwa woumuto ape aile aliakewa waliko ti amuto ailele imat. Na tap, nga luama xaxaweniai tehu tutuhi lul ape amuto silahota tautamus, amuto kum hukuma uke hanowi teka kahikahik. Nga kum aile ukek ien mewenae na amuto towiahu.

<sup>6</sup> Tuahe hina waliko ti nga waheni leilomuto. Amuto watakai hawane lialui puase teka Nikolaitan hanowi ti nga watakai.

<sup>7</sup> “Na amuto hina taxing ti hongoi kakain, amuto hong matainiwa waliko ti Holi Spirit kaakane hatesol kahikahik. Tel na i waxaini saliniai totohong ma lawe waliko lialun, nga hani i aniai huai pata ti i xexex he kini Haeu ti tesol soliai tonan. Teteka laha ani huai pata ien, laha to kapi Haeu lian tehue.”

### *Kakain hani teka kahikahi Krais ti Simirna*

<sup>8</sup> Ape imuh i kakane nga ukek, “Tai haniwa tel engel ngahatiai teka kahikahik ti Simirna kewak. Ie se kakai tetel ti hutuiai ma tiliai lawe waliko, tetel i mat ape i moih aliawen.

<sup>9</sup> “Nga tioi kawatan tenen tenen ti laha hahani amuto ma tin ti amuto tap soxi. Tuahe amuto

xuhai waliko ti Haeu. Nga tioi hina seilon laha kaxi sawateni kakain puputa sale puasamuto. Tin laha ukek laha se Ju teka seilon ti Haeu tuahe salan tetan laha seilon ti Satan.

<sup>10</sup> Kum maamata tesol kawatan lehe ape i tu-nahi amuto. Hongoa! Satan hanamiloa teka seilon ti kalabusiamuto ti tohongiai xoxoi namilomuto tetak. Amuto kau kawatan ien ti teik taun kukunun. Amuto tu xox tatalewa tetak kalak na laha telei amuto. Ape nga hani kahumuto tonain tuah kapi Haeu ti tap tahi tapoan.

<sup>11</sup> “Na amuto hina taxing ti hongoi kakain, amuto hong matainiwa waliko ti Holi Spirit kaakane teka kahikahik. Tel na i waxaini saliniai totohong ma lawe waliko lialun, i kum uke tehu kawatan imuh ti tap tahi tapoan.”

### *Kakain hani teka kahikahi Krais ti Pergamum*

<sup>12</sup> Imuh i kakane nga ukek, “Tai haniwa tel engel ngahatiai teka kahikahik ti Pergamum kewak. Ie se kakai tetel tea ngolun hahupaun angian.

<sup>13</sup> “Nga tioi amuto toto leili taun ti Satan neini hahawane kilan seilon. Tuahe saka amuto hamalum tatale kahikahik wanen ma amuto tai aka lioi xoxoi namilomuto tetak. Kalak ti lokon laha telei tel unauak pate solian axan Antipas leili tehu taon ti amuto, amuto tu xoxox tutuen tetak.

<sup>14</sup> “Tuahe hina palaihai waliko nga kum amuke leilomuto. Teka ti amuto usiusi waliko ti Balam hahanau. I itini namili tel masiwi Balak ti aleheteriai teka Israel ti aniai an tenen laha ailewen pali hani haeu tenen kumahe salan ma ailei saun lialun ti wawan hehin.

**15** Tin masin teka ti amuto usiusi waliko lialun ti teka Nikolaitan hahanau.

**16** Aile ape towiahua ti tesol waliko ien. Na tap, kum kue nga luama ti hil pahoxaiamuto tea ngol he awak i se kakai Haeu pate tuah.

**17** “Na amuto hina taxing ti hongoi kakain, amuto hong matainiwa waliko ti Holi Spirit kaakane teka kahikahik. Tel na i waxaini saliniai totohong ma lawe waliko lialun, nga axi i an tuah ti Haeu alolomeni hani kahun. Tin nga hani i tehu hat papaxaxun hina tenen ax haun ti Haeu taiwen. Tap tel seilon tioi tenen ax ien, mewenae tetel ukei tehu hat.”

### *Kakain hani teka kahikahi Krais ti Tiatira*

**18** Imuh i kakane nga ukek, “Tai haniwa tel engel ngahatiai teka kahikahik ti Tiatira kewak. Ie se kakai tel Nati Haeu, tetel pulan i kamakam hanowi xekei ah ma titi aen i talepalep hanowi samen tenen laha lui hauniwen.

**19** “Nga tioi waliko ti amuto ailele. Nga tioi wawahen ti amuto, xoxoi namilomuto tetak, soliai pupuasamuto ma ti amuto tu xox tatale kalak ti kawatan tutunahi amuto. Solian ti amuto ailele aope ie, i xoiniwen ti imat.

**20** “Tuahe hina waliko nga kum amuke leilo-muto. Teka ti amuto paxai lioi saun lialun leilo-muto, tetenen ti tel hehin ti imat axan Jesebel ailele, tetel i putini ukek ka i tel kuluiai kakai Haeu. Teka ti amuto usiusi tutuen lialui woun ape i neini hasele teka unauak ailei saun lialun ti wawan hehin ma aniai an ti laha ailewen pali hani waliko tenen kumahe salan Haeu.

**21** Nga axiwen amuto taun ti na amuto towiahu ti tesol saun lialun ien tuahe kumahe pahamuto.

**22** “Aile ape teteka ti amuto to ailele saun lialun ti wawan hehin masin ti Jesebel hahanau, nga hatinu halialu amuto ape nga axi amuto kawatan tenen lalap, halik na amuto towiahu ti lialui woumuto.

**23** Nga telei xaxaweni teteka laha usiusi saun tenen ti Jesebel hahanau. Ape teka kahikahik paxai tioi ka nga tetel nga tioi hatapo namil hetekie isiai pahe seilon. Nga kahui hapoponowi hani amuto usiwa waliko ti amuto ailele.

**24** “Tin hina kakaiak hani amuto teka liai leili Tiatira, teteka ti kumahe amuto usiusi tenen saun ien ma waliko ti laha ukek kakain tuahe ti Satan hatakei hani teka unauan. Nga kum hakawata aheke amuto na tenen.

**25** Tuah aile kapitiniwa soliai puasamuto ma tu xoxoa ti namilomuto tetak atengi taen nga aliamma.

**26** “Teteka laha waxaini saliniai totohong ma lawe waliko lialun ma laha aile usi nauna tetak atengi taen matealaha, nga hani laha neiniai teka seilon ti xux tenen tenen.

**27** ‘Nga hani lato poh ti neiniai seilon  
masin ti nga kema ti Haeu tel Tamak.

Nenein ti lato ahian wanen  
kane teka seilon laha tahi kakai Haeu.

Lato aile halialu teka ien hanowi patula kalas  
ti i put ape i takel wikawika.’ *(Ps 2:8-9)*

**28** “Nga hani hetekie lato tehu kohot towisaian ti kolakol ka lato waxainiwen lawe waliko lialun.

**29** “Na amuto hina taxing ti hongoi kakain, hong matainiwa waliko ti Holi Spirit kaakane hatesol kahikahik.”

## 3

### *Kakain hani teka kahikahi Krais ti Sadis*

**1** Imuh tel masiwi kakane nga ukek, “Tai haniwa tel engel ngahatiai teka kahikahik ti Sadis kewak. Ie se kakai tetel i akekeni tesol tefanim huohu kohot ma i xuhai Holi Spirit.

“Nga tioi waliko ti amuto ailele. Seilon sokok namilomuto xoxoan tetak tuahe salan wanen, xoxoi namilomuto tetak i tapoen.

**2** Kanipetiwa sale woumuto. Waliko solian ti amuto ailele imat, i tapo kakalutawa. Haxoxo aliakewa nake nga kum namiloi ukek puasamuto pate sawisawin usiwa namili Haeu.

**3** Aile ape nameni aliakewa kakai Haeu ti amuto hongoen. Towiahua ti lialui woumuto ape puas usiwa tenen kakain ien. Na amuto kum towiahua, nga lua hanowima tel seilon xuxuina, amuto kum tioi hawane loke tahiaiak.

**4** “Tuah hina teka ti amuto ti Sadis, amuto kum ailele saun tenen i halolo amuto. Amuto uke puxux tenen papaxaxun ma amuto xohixohin wanen kapik nake ti soliai woumuto.

**5** Hatesol seilon laha waxaini saliniai toto-hong ma lawe waliko lialun, puxuaulaha tin papaxaxun. Nga kum susuni wanen axalaha ti Haeu tai konginiwen ti ukei tonain kapin ti tap tahi tapoan. Ti puli Haeu tel Tamak ma teka engelaun nga kaxi ahuti ka teka seilon ien se tetak.

**6** “Na amuto hina taxing ti hongoi kakain, hong matainiwa waliko ti Holi Spirit kaakane hatesol kahikahik.”

*Kakain hani teka kahikahi Krais ti Piladelpia*

**7** Imuh i kakane nga ukek, “Tai haniwa tel engel ngahatiai teka kahikahik ti Piladelpia kewak. Ie se kakai tetel i sawisawin tapein ma lawe salan. I tel Masiwi tapein. Masin ti lokon tel masiwi David neini teka Ju, i tetel neiniai lawe seilon. Na i sowini tenen na waliko, tap tel pon halinian. Na i halini tenen, tap tel pon sowinian.

**8** “Nga tioi waliko ti amuto ailele. Nga tioi ka ti puli teka seilon liai axamuto kumahe lalap. Tuahé amuto akeni kokongini tutuen nauna tetak ma amuto tai puluhini ka amuto tetak. Nga hei haniwen amuto tewau aweisal ti tap tel pon konginian.

**9** A teka laha putini laha seilon ti lotuiai Haeu, tuahé salan tetan laha seilon ti Satan, nga aile lehe laha lokuha lakua hani aemuto ape laha hatesol paxai tioi ka nga waheni amuto.

**10** “Masin ti nga honewen amuto, saka amuto tu xox tatale tetak kalak kumahe malimun ti usian. Aile ape nga awai amuto ti tehu kawatan i luluainima ti lehe Haeu tohongi paxai woi lawe seilon.

**11** Luaiak hani kapimoto xohiwen. Aile kapi-tiniwa soliai puasamuto ma tu xoxoa ti namilomuto tetak lehe amuto kum lioi soliai kahumuto ti Haeu apeseniwen.

**12** Teteka na laha waxaini saliniai totohong ma lawe waliko lialun, nga aile laha sohot hanowi kuku tuah ti leili Ingi Haeu. Laha hamalum

hawane kapi Haeu. Ape nga tai axe Haeu tel Tamak he kawalaha kolaian ka laha ti Haeu. Nga tai hetekie axe tehu taon ti Haeu axan Jerusalem haun i ahuma ti tonan, kolaian ka laha to tehu taon ien lian tehue. Tin nga tai hetekie tenen axak haun, kolaian ka laha pakata xoxoen kapik.

**13** “Na amuto hina taxing ti hongoi kakain, hong matainiwa waliko ti Holi Spirit kaakane hatesol kahikahik.”

*Kakain hani teka kahikahi Krais ti Laodisia*

**14** Imuh i kakane nga ukek, “Tai haniwa tel engel ngahatiai teka kahikahik ti Laodisia kewak. Ie se kakai tetel i lawe salan. I tel unaui Haeu wanen ma waliko ti i kakak sale Haeu mewenae salan. Nake ti i, Haeu tanomi lawe waliko.

**15** “Nga tioi waliko ti amuto ailele. Nga tioi ka amuto kumahe ahian ma na wawaxixin ti ailei lawe puasak. Nami amuto kewa tenen ti lalu.

**16** Tuahé amuto kumahe ahian ma na wawaxixin, amuto tuahe patatal. Amuto woinakon ailei lawe puasak. Tap wanen anan. Aile ape nga tale tehitok hani amuto.

**17** Amuto ukek ka amuto tapai hawanewen ti lawe waliko. Tuahé amuto kum paxai tioi ka amuto tae hawane waliko ti Haeu pahan. Amuto seilon tenen tap wanen amuam. Amuto masin teka pulaxa ma makahul. Ala amuto hienake aliakewa woumuto.

**18** Na pahamuto wanen lehe amuto tapai hawane, haelielawa usiak ti haxoxoi namilomuto ti Haeu. Ien se pate tuah masin gol laha lui hauniwen. Amuto usiwa soliai wouk lehe amuto sosoi maia papaxaxun i kola ka amuto ape haun hanowi seilon tenen i sosoi maia atuhian ti i

makahul. Hong matainiwa kakaiak lehe amuto xeu hawane ti lawe waliko salan hanowi seilon tenen i hana marasin hani he pulan lehe i paxapax alua.

**19** “Teteka nga waheni, nga tumei ma nau hasawi ti laha tahi kakaiak. Towiahua ti lialui woumuto ape hahiawa ailei puasak.

**20** “Hongoa! Lawe nga tu kiikini kahip ti aweingamuto. Na amuto hong kinaxok ape hei aweing, nga soh ape kako to ang he lawalau.

**21** “Teka laha waxaini saliniai totohong ma saun lialun, nga hani laha to kapik ti neiniai seilon masin ti nga waxainiwen ape nga kapi Haeu tel Tamak neiniai seilon.

**22** “Na amuto hina taxing ti hongoi kakain, hong matainiwa waliko ti Holi Spirit kaakane hatesol kahikahik.”

## 4

### *Lotuiai Haeu ti tesol tonan*

**1** Muhi tesol waliko ien, Holi Spirit hanamiloa ulea nga ape nga ningahi tewau aweing hean ti tone Haeu. Tin nga hong ulea lalape tenen kinax masin tangiai suhusuh. I wix ukek, “Lua hanima kapik patul lehe nga kola hani o waliko ti na i sohot muhin.”

**2** Tuhan tehue Holi Spirit kapiti namilok ape nga ningahi tehu totoan pate tuah ti tone Haeu ti tel seilon toto.

**3** Tanome tel seilon ien i talepalep hanowi waliko tenen pate i kamakam. Kakalini tehu totoan ien tehu poto, lalape xewaian masin leili sup ti i tai unauna na alon hokai hatalepalepa.

**4** Tin 24 totoan tuah liai kakalini i hetekie 24 masiwi toto ien. Puxuaulato papaxaxun ma patulato hin tah tenen ani gol.

**5** Ahuma he tehu totoan tuah xepai usil ma tangiai kuhuh. Mateiwaun tepanim huohu lul kamakam. Lato kikilami Holi Spirit, tetel pate pohen.

**6** Mateiwaun tin masin kanitax tenen na pate tanenan ma xewan.

Hinalo seilon tutu kapi tehu totoan ien, hua papan tepaun ape hua liai tepaun. Kilan pulalato, sai matalato ma tehitolato.

**7** Tel ti lato tanoman masin tok pusi lalap axan laion, tel liai masin tok bulmakau, tel ulea kawan masin kawe seilon ma tel tapeinan masin tok keihat paun holaian. **8** Lato tel tel hina paulato masin pai manixux tuahe paulato tepanim tehu. Kilan pulalato he paulato, patul ma hahitakan. Ngain ma ipong lato to kakak ukek,

“Haeu tel Masiwi i sawisawin tapein ma tel poh tapein.

I hoi liai ti imat, aope ma tin i luluainima tutuen!”

**9-10** Tapai na tesol hinalo seilon ien kak kemulik ma haxawa axe tetel i toto he tehu totoan tuah, tesol 24 masiwi lawe lato lokuba lakua mateiwaun ape lotui i, tetel tap tahi matean. Tesol tah he patulato ti kolai masiwialato, lato hana xaxaweni hani mateiwai tehu totoan pate tuah. Ape lato ukek,

**11** “Haeu tel Masiwi ti amite,  
tapai hawane amite haxawa axam  
ma sameni lalape pohem  
nake o tetel tanomiai lawe waliko.

Lawe waliko ti o tanomiwen  
i ahuma ti puki namilom.”

## 5

### *Teik pepa tuah ma tok sipsip uluha*

<sup>1</sup> Muhin nga ningahi teik pepa tuah luminan he min manau ti tetel i toto he tehu totoan tuah. Taian papan hahupaun a pakatan, tepanim huohu papakat uke konginian. <sup>2</sup> Ape nga ningahi tel engel pate pohen i tilol kamekam, “Aita tel i sawisawin ti puli Haeu i tapai tosei tesol papakat ma heiai teik pepa ie?”

<sup>3</sup> Tuahe tap tel seilon ti tone Haeu, tehu pon ie ma na hahitakan i tapai heiai teik pepa tuah ien ma paxaian.

<sup>4</sup> Nga tang welu hawane nake tap wanen tel tapai.

<sup>5</sup> Ape tel ti tetesol masiwi i hone nga ukek, “Kum tangitang! Hongoa! Tetel masiwi pate pohen i nakuama ti teka Juda ti tel masiwi David, i waxaini xoiniai lawe waliko lialun. I tapai hawane tosei tesol papakat ti teik pepa tuah ien ma paxaian.”

<sup>6</sup> Muhin nga ningahi tok sipsip uluha tanoman masin ka totok laha teleimu. I tutu kapi tehu totoan tuah, kakalini i tetesol hinalo seilon ma tetesol 24 masiwi. He patun tepanim huohu su-laun ma tepanim huohu pulan lato kikilami Holi Spirit tel pate pohen ti Haeu talo hani hatesol xux he tehu pon ie.

<sup>7</sup> I kiheta waxy teik pepa tuah he min manau ti tetel i toto he totoan tuah.

<sup>8</sup> Ti i akeniwa, tetesol hinalo seilon ma tetesol 24 masiwi lato lokuba lakua mateiwai tok sipsip

uluha ien. Tel tel ti lato akekeni tehu harp, waliko ti wexoiai tangiai pak. Tin lato akekeni hetekie kapi ani gol. Leilon sanda tenen poun pate solian i kikilami lotu ti teka seilon ti Haeu.

<sup>9</sup> Lato pakui tenen pak haun ukek,

“O tapai hawane waxiai  
 teik pepa tuah  
 ma tosei papakat  
 ti heian  
 nake laha telei o  
 ape ti mateam o uke  
 kahi lialui woi seilon.

O aile ukek ien lehe teka  
 seilon ti lawe xux  
 ma nenex,  
 kakaialaha tenen tenen, laha sohot unaui  
 Haeu wanen.

<sup>10</sup> O aile ape laha sohot seilon ti hahitake nenein ti  
 Haeu,  
 teteka laha aile hatapo waliko ti i kilami hani-  
 wen laha  
 ma aweisalulaha hani i mewenae hean.  
 Ape laha neini teka seilon ti tehu pon ie.”

<sup>11</sup> Ti nga to paxapax nga hong kinaxe teka kilai engel, mongohualaha kaha kum pon wanen wexe-an. Laha tu kakalini tehu totoan tuah, tetesol hinalo seilon ma tetesol 24 masiwi.

<sup>12</sup> Laha pak ausisini ukek,  
 “Tok sipsip uluha ie se totok laha teleimu.  
 I tapai hawane kako sameni lalape pohen,  
 anesoan ma kuin.

I pono wanen ti lawe waliko.  
 Kako haxawawa axan.”

<sup>13</sup> Ape nga hong lawe seilon ma manihuh ti tone Haeu, he tehu pon ie ma hahitakan hetekie ti itax, laha pak ukek,

“Kako sameniwa lalape pohe tetel i toto  
he tehu totoan tuah  
hetekie tok sipsip uluha.

Kako haxawawa axalalu lian tehue.”

<sup>14</sup> Tetesol hinalo seilon kak ukek, “Salan wanen!” Ape tesol 24 masiwi lokuha lakua lotuialalu.

## 6

### *Tetesol papakat ti teik pepa tuah*

<sup>1</sup> Muhin nga ningahi tok sipsip uluha ien i tose tehu ti tesol tepanim huohu papakat ti he teik pepa tuah. Ape nga hong tel ti tetesol hinalo seilon i tilol hanowi tangiai kuhuh ukek, “Kiliwama!”

<sup>2</sup> Ti nga paxawa, nga ningahi tok hos papaxaxun tutu matak. Tel seilon i toto patul tetan i akekeni tehu ponar. Ape Haeu hana teik tah tuah he patun kolaian ka i masiwi. Ti i kiliwawa, i waxaini kilan hilehile atengi tataen i xoiniwa lawe waliko lialun.

<sup>3</sup> Ti tok sipsip uluha tosewa tehu papakat liai, nga hong tel liai ti tetesol hinalo seilon ukek, “Kiliwama!”

<sup>4</sup> Ape tok hos kakan wanen kiliwama. Tel seilon patul tetan, Haeu sowini hani i hatanoi wasol lehe teka seilon he teletel. Aile ape Haeu hani i tea ngol weluwelun ti hile.

<sup>5</sup> Ti tok sipsip uluha tosewa tehu papakat liai, nga hong tel liai ti tetesol hinalo seilon ukek, “Kiliwama!” Ti nga paxawa, nga ningahi tok

hos polupolun tutu matak. Tel seilon patul tetan akekeni waliko ti kolongenai kawate an.

<sup>6</sup> Ape nga hong tenen kinax i ahuma ti tetesol hinalo seilon i ukek, “Kilo tewaok suka ma kilo tehu komem kahun pate lalap. Hapuasa aluiniwa wel ma waen uke i tae.”

<sup>7</sup> Ti tok sipsip uluha tosewa tehu papakat liai, nga hong tel tapeinan ti tetesol hinalo seilon i ukek, “Kiliwama!”

<sup>8</sup> Ti nga paxawa, nga ningahi tok hos tutu matak. I papaxaxui nalenalen, tanoman i tinun. Tel kiliwakean axan Matemate ma tel liai kapin axan Hades i kikilami tesol tone teka maten. Haeu sowini hani lalu teleiai teka seilon laha toto tenon ti tehu pon ie. Lalu hapuasa ngol weluwelun ma manihuh tenen tumun kalimen hetekie lalu hahitolo ma hatinu seilon.

<sup>9</sup> Ti tok sipsip uluha tosewa tehu papakat liai, nga ningahi tesol tone waliko ti seilon kau hani Haeu. Hahitakan nga ningahi teteka seilon ti kemuk teka liai telei nake lato kaxi ahuti kakai Haeu ma lato tu xox ti kakain salan tetan.

<sup>10</sup> Lato tilol eliel hawane ukek, “Haeu tel Masiwi tapein, tel sawisawin tapein ma salan wanen, malehe ape kuehuan ia na o paxai kolongeni woi lawe seilon ti tehu pon ie ape o kahui aliake hani teka laha telei amite?”

<sup>11</sup> Ape tel tel ti lato uke tehu puxux papaxaxun a weluwelun. Muhin Haeu hone lato ka nutomu atengi tataen ti teleiai teka akikilato ti Krais, teka tuaulato ailei puase Haeu mongohualato i meiwa ti Haeu kilamiwen.

<sup>12</sup> Imuh nga ningahi tok sipsip uluha ien tose tehu papakat liai ti teik pepa tuah. Ti i tosewa, xux nuea eliel hawane. Alon i kum kam ape i tilok

hawane. Pangapang sohia hahutuia hani kakan masin wanen kaka.

<sup>13</sup> Kohot ti he maun put hani itan hanowi huai pata ti aupol huei haputa.

<sup>14</sup> Maun tapo hanowi na teik tahi i lumina alia. Hatesol xux ma maunten laha naxia ti tutuhalaha.

<sup>15</sup> Ape teka masiwi tenen tenen ti tehu pon ie hetekie teka masiwi ti hile, teka seilon kilan soxi, teka axalaha lalap, teka laha unaui seilon ma teka laha kumahe unaui seilon, laha hatesol muna hani wal ti he pot ma wasole pot he maunten.

<sup>16</sup> Laha tiloi eliel hahani maunten ma pot ukek, “Put atuhi munenima amite ti puli tetel i toto he tehu totoan tuah ma ti lengei tok sipsip uluha kapin.

<sup>17</sup> Tehu ngain lialun ti lengealalu tahiawen. Tap tel i kuosel ti tenen kawatan ien.”

## 7

### *Teteka seilon hina kikilam ti Haeu*

<sup>1</sup> Muhin nga ningahi hinalo engel lato tu tapai-wen hinalosumun ti tehu pon ie. Lato kokongini hinalosol ahoi aupol lehe i kum ah hani xux, kanitax ma tea na pata.

<sup>2</sup> Haeu hani lato poh ti aile halialui xux ma kanitax. Tuahe tel engel liai i sohotuma sai angiba. I akekeni waliko ti hanai kikilam ti Haeu tel tap tahi matean. I tilol eliel hani tesol hinalo engel ukek,

<sup>3</sup> “Kum aile hahalialumu xux, kanitax ma na pata atengiwa taen amite hana kewa kikilam ti Haeu he kawe teka unauan.”

<sup>4</sup> Ape nga hong ka mongohe teteka seilon laha hina kikilam ti Haeu 144,000 seilon ti lawe nenex ti Israel.

- <sup>5</sup> Teteka laha ahuma tehu nenex ti Juda 12,000 seilon,  
 tehu ti Ruben 12,000,  
 tehu ti Gad 12,000.
- <sup>6</sup> Tehu nenex ti Aser 12,000 seilon,  
 tehu ti Naptali 12,000,  
 tehu ti Manase 12,000.
- <sup>7</sup> Tehu nenex ti Simeon 12,000 seilon,  
 tehu ti Livai 12,000,  
 tehu ti Isaka 12,000.
- <sup>8</sup> Tehu nenex ti Sebulun 12,000 seilon,  
 tehu ti Josep 12,000  
 ma tehu ti Benjamin 12,000.

*Teka kilai seilon puxuaulaha papaxaxun a weluwelun*

<sup>9</sup> Muhin nga ningahi teka kilai seilon mongo-hualaha kaha kum pon wexeana. Laha ti lawe xux, nenex tehu tehu ma kakai alaha tenen tenen. Laha tutu mateiwai tetel Masiwi i toto he tehu totoan tuah ma totok sipsip uluha kapin. Puxuaulaha papaxaxun a weluwelun ma laha akekeni kai hatoh.

<sup>10</sup> Ape laha tilol eliel ukek,  
 “Haeu tel Tamakaha, tetel i toto he tehu totoan tuah  
 ma totok sipsip uluha kapin, lalu se awa-iakaha.”

<sup>11</sup> Hatesol engel laha tu kakalini tehu totoan tuah, tetesol 24 masiwi ma tetesol hinalo seilon. Laha lokuha lakua hani itan mateiwai tehu totoan tuah ien ape laha lotu sameni Haeu.

<sup>12</sup> Laha ukek,  
 “Salan wanen. Kako sameniwa lalape pohe Haeu,  
 anesoan ma kuin.  
 Kako haxawawa axan ma

kak kemulik haniwa i lian tehue.  
Salan wanen.”

<sup>13</sup> Ape tel ti tesol 24 masiwi kamei nga,  
“Aita tesol seilon ie puxualaha papaxaxun a  
weluwelun? Laha ahuma ia?”

<sup>14</sup> Nga pahoi ukek, “Tel masiwi, nga kum tioi,  
puki o tioi.”

Ape i kakane nga, “Teteka seilon ie laha wax-  
ainiwen kaui kawatan lalap. Puxualaha papax-  
axun nake ti matei tok sipsip uluha i nuhi hauni-  
wen laha ti lialui woulaha.

<sup>15</sup> “Aile ape laha hahamalum kapi Haeu  
mate tehu totoan tuah tetan  
ape ngain ma ipong laha ailele puasan leili  
tehu Ingan.

Ape ngangahat tetan i kalauhi laha.

<sup>16</sup> Tap hitolo ti tenen na waliko tunahi ulei laha.  
Kekei alon ma na waliko liai tin i kum keti  
laha.

<sup>17</sup> I sohot ukek ien nake totok sipsip uluha kapi  
Haeu  
i ngangahati ma neneini laha hani Haeu  
masin ti na kinawe seilon pate paxepaxen  
ape tel i neini laha hani tehu kan.

Ape tatahan kum hatangi ulei laha  
nake Haeu xaxaweni hatapo lawe kawatan.”

## 8

*Tehu papakat tapeinan ma tehu sanda poun  
pate solian*

<sup>1</sup> Ti tok sipsip uluha ien tosewa tehu papakat  
tapeinan, sai leili aua tewaok tap wanen tangiai  
tenen na waliko ti tone Haeu.

<sup>2</sup> Ti nga paxawa, nga ningahi tepanim hua engel tutu mate Haeu. Tel tel ti lato uke tehu suhusuh.

<sup>3</sup> Muhin tel engel liai nahih tu mateiwai tehu totoan tuah kapi tesol tone waliko ti haniai Haeu. I akekeni tehu kapi ani gol ti lohiai sanda tenen poun solian. I uke kilan tenen sanda ien lehe i hani Haeu hetekie lotu ti teka seilon tetan, patul ti tesol tone hanian waliko. Tesol tone waliko ien ani gol.

<sup>4</sup> Ti sanda ien lulua, axuan i hok sawile he tehu kapi ti tel engel akekeni hani Haeu hetekie lotu ti teka seilon tetan.

<sup>5</sup> Muhin tel engel waxi nawal xoan he tesol tone waliko ti haniai Haeu, i lohi hani tehu kapi ape i towi hani tehu pon itan. Ti i towiwa, i hatano lalape tonui kuhuh, xepai usil ma xux i nuea eliel.

### *Tepanim huhua engel ma tepanim huohu suhusuh*

<sup>6</sup> Muhin, tesol tepanim huhua engel lato akekeni suhusuh, lato apepeas kuinian.

<sup>7</sup> Ti tel engel imat kuiniwa tehu suhusuhaun, lalape puli akah tenen pate waiwain ma ah hetekie kaka, i put hani tehu pon itan. I lui tenon ti tehu pon itan hetekie tenon ti pata ma hatesol pahoah.

<sup>8</sup> Ti tel engel usian kuiniwa suhusuhaun, tenen waliko masin maunten lalap i xek towia hani itax. Tenon ti kanitax kolita hani kaka.

<sup>9</sup> Tenon ti lawe waliko moihin ti itax mat ma waian ti langalang, tenon ti laha manan.

<sup>10</sup> Ti tel engel liai kuiniwa tehu suhusuhaun, tehu kohot lalap i xekexek hanowi lul, i putalih he maun hani tenon ti kan ti unum he tehu pon itan.

**11** Tehu kohot ien axan Maxaian. I hamaxaia tenon ti kan ape kilan seilon laha mat ti unumian.

**12** Ti tel engel liai kuiniwa tehu suhusuhaun, tenen waliko i aile halialu tenon ti alon, pangapang ma kohot. Aile ape al tai kam tenon ti ngain tehu ma pangapang hetekie kohot tin i tai kam tenon ti ipong tehu.

**13** Ti nga to paxapax, nga hong tok keihat ngongong he maun patul, i tilol eliel ukek, “Taun pate lialun i luluainima. Sikole wanen tolu engel liai kuini suhusuhaulato ape kawatan pate lalap tunahi teka seilon ti tehu pon itan.”

## 9

**1** Ti tel engel liai kuiniwa tehu suhusuhaun, nga ningahi tehu kohot kemuk patul he maun ape i put haniwen he tehu pon ie. I moih hanowi seilon. Haeu sowini hani i heiai mate tewau wal pate walawalan wanen.

**2** Ti i heiwa, axuan kilakilan wanen ahutale masin na kaha lui kai pata moihi. Lalape axuan ien i hatiloko kamai al ape xux i tilok.

**3** Ti leili axuan ien kilan wanen kukunalel ahuta hani tehu pon ie. Laha pon wasi halialui seilon hanowi mini anepapap.

**4** Haeu halini laha ti aile halialui pahoah, pata tenen tenen ma lawe waliko ti i xexex he hep-ekun. Laha aile halialu mewenae teteka seilon tap kikilam ti Haeu he kawalaha.

**5** Haeu kum sowini hani laha teleiai teka seilon ien tuahe ti axialato moloan lalap ti leili pangapang tepanim. Moloan ti lato lalamani masin na mini anepapap wasi seilon.

<sup>6</sup> Leili tesol ngain ien, lato aile ngah aweisal lehe lato mat tuahe lato kum mat uke. Pahalato wanen lato mat xaxau tuahe matemate kum tunahi lato.

<sup>7</sup> Paxaiai teka kukunalel ien masin teka hos seilon apeseniwen ti hile. He patulaha tah tenen ani gol a kawalaha masin kawe seilon.

<sup>8</sup> Ukulaha weluwelun masin uki hehin a nisu-laha masin nisi oha.

<sup>9</sup> He patanawalaha hina titieh ti hile ani saman ma tangiai paulaha masin tonui kilai hos kikili-wau ti hilehile.

<sup>10</sup> Kolohelaha masin ti anepapap hina minun ape laha hapuasa ti halialui teka seilon leili pangapang tepanim.

<sup>11</sup> Tel masiwi neinialaha i tetel engel ngahat-tiai tewau wal walawan wanen. Ti kakai Hi-bru axan *Abadon* ma ti kakai Grik axan *Apolion*. Salangawe tenen ax ien i ukek, “Tetel halialui waliko.”

<sup>12</sup> Kawatan tehu ape i tamusuen tuahe huonen kawatan luluainima tutuen.

<sup>13</sup> Ti tel engel liai kuiniwa tehu suhusuhaun, nga hong tenen kinax i ahuma hinalosumun ti tesol tone waliko ti haniai Haeu. Tesol ien se ani gol i tutu mate Haeu.

<sup>14</sup> Tenen kinax ien kakane tetel i kukuini tehu suhusuh ukek, “Oxoxi lioiwa tetesol hinalo engel xinotan he tehu kan lalap axan Epratis.”

<sup>15</sup> Tesol engel ien hoi liai Haeu apeseniwen lehe i hapuasa ti tehu ngain ie. Ape tel engel oxoxi lioi lato ti teleiai tenon ti teka seilon ti tehu pon ie.

<sup>16</sup> Tetesol hinalo engel lato neiniai teka seilon ti hile he hos. Nga hong ka kilaialaha sai 200 milion.

<sup>17</sup> Ti paxapaxa tetak, titieh ti he patanawe teteka seilon ti hile kakan masin xekei ah, ati polui ax-axawan ma tin angoangoi ati polun. Tanome pati teka hos masin pati laion manihuh tenen tumun pate kalimen. Ah ma axuan ahutama he awalaha hetekie salfa, waliko tenen na i lua poun telei seilon.

<sup>18</sup> Totolunen waliko i ahutama he awe hos se pate lialun wanen, i telei tenon ti teka seilon ti tehu pon ie.

<sup>19</sup> Pohelaha ti halialui seilon i ahuma he awalaha ma kolohelaha. Tanome kolohelaha masin weiko tenen ti atalahi hamangei seilon.

<sup>20</sup> Teteka seilon ti tolunen waliko ien tai telei laha, tin laha tai totowiahu ti lialui woulaha. Laha lotui kakapitini spirit lialun ma waliko tenen laha tua tanomi ani gol, silva, brons, pot ma pata. Tesol waliko ien kum pon i paxapax, hong ma tin kum nahih uke tuahe laha lotui hanowi ka Haeu.

<sup>21</sup> Tin laha tai aile lilioi teleiai seilon, apelaha ti hilihil, saun lialun ti wawan hehin ma saun ti xuxuina.

## 10

### *Tel engel ma teik pepa liai*

<sup>1</sup> Muhin nga ningahi tel engel liai pate pohen i momosulih tesol tone Haeu. I puxupuxua leili maun hetekie tehu poto onote patun. Kawan kamakam hanowi xame alon a aen masin kuku na i xekexek.

<sup>2</sup> I akekeni teik pepa tuah luminan a ape holaian he minan. I hatuhi tepaun aen manau hani itax ape tepaun kalamau ixux.

<sup>3</sup> I tilol eliel hawane. Lalape kinaxon masin uhuhai laion, manihuh tenen tumun kalimen. Ti i tiloa, tepanim huohu kuhuh wixile.

<sup>4</sup> Pahak nga tai waliko tenen ti kuhuh kakak tuahe tenen kinax i ahuma ti tone Haeu i ukek, “Kum tatai. I tai meiwa taun ti kaxi hatakeiai waliko ien.”

<sup>5</sup> Muhin tetel engel nga ningahi i tutu itax ma ixux, i tulini tepaun minan manau hani tone Haeu.

<sup>6</sup> Ape i kak kuinake ti axe Haeu tel i moihiin lian tehue, tel i tanomi maun aheah, tehu pon ie, kanitax ma hatesol waliko heihon. I ukek, “Haeu kum hatalia aheke waliko ti i namiloiwen.

<sup>7</sup> Taen ti na tel engel tapeinan kuiniwa tehu suhusuhaun, hatesol waliko ti Haeu tai hatakei hani seilon ape i sohot poponowi masin ti i kakanewen teka unauan ti kuluiai kakaian.”

<sup>8</sup> Ape tenen kinax ahuma ti tone Haeu kakane ulea nga i ukek, “Waxiwa teik pepa tuah he mini tel engel i tutu itax ma ixux.”

<sup>9</sup> Nga nahih haniwa kapi tel engel ape nga kamei na i hani nga teik pepa tuah. I hone nga ukek, “Waxiwa ape anixa. I aile hamaxaia leili tiam tuahe namun ti he awam paoaian suka.”

<sup>10</sup> Nga waxiwa teik pepa tuah he minan ape nga ani. Namun ti he awak paoaian wanen suka tuahe ti nga tolomiwa i hamaxaia hawane leili tiak.

<sup>11</sup> Ape i hone nga ukek, “Kaxi ahuti tatalewa kakai Haeu. Kaxi hatakeiwa waliko na i sohot hani teka seilon tenen tenen ti xux tesol tesol, kakaialaha tenen tenen hetekie teka masiwi ti laha.”

# 11

## *Hua seilon kuluiak kakai Haeu*

<sup>1</sup> Muhin nga uke teik pata ti kolongenai welui waliko ape Jises hone nga ukek, “Nahih kolongenwa tehu Ingi Haeu ma tesol tone hanai waliko ti hanian ape wexewa mongohe seilon laha lolotu ien.

<sup>2</sup> Tuuhe kum kokolongeni soxi tini Ingi Haeu sai melal nake ien Haeu haniwen teka laha kum tioi i. Imuh, leili 42 pangapang, laha aile halialu teka seilon ti Jerusalem tehu taon pate tuah ti Haeu.

<sup>3</sup> Ape nga hapohea hua seilon kaxiai menge Haeu lehe lalu kului kakaian leili 1,260 ngain. Telok ien lalu puxui puxux tetenen i kola lalape tatahan.”

<sup>4</sup> Huhua seilon ien lalu masin hua pata tenen oliv ma huohu tutuhi lul ti i tutu mateiwai Haeu tel Masiwi ti tehu pon ie.

<sup>5</sup> Na tel tohongi hamangealalu, xekei ah i pusuama he awalalu teleian. Teka laha watakai lalu ma aile halialu lalu, laha mat ti xekei ah ien.

<sup>6</sup> Lalu hina poh ti konginiai maun lehe akah kum ux leili taun ti lalu kukului kakai Haeu. Tin lalu pon kolitiniai lawe kan hani kaka ma hatanoi kawatan tenen tenen hani tehu pon ie tuahe telao ti na pahalalu.

<sup>7</sup> Tataen na lalu tiliwa kaxi ahutiai kakai Haeu, tel spirit lialun tanoman masin manihuh tenen tumun pate kalimen i sohotule he tetewau wal walawalan wanen. I pamu kuiaian ape i telei lalu.

<sup>8</sup> Ti ngain toluhu tewaok tupualalu tua engeeng maten he aweisali tetehu taon lalap ti laha telei

Jises tel Masiwi ti lalu. Tehu taon ien laha kolongeni hani Sodom ma Igip.

<sup>9</sup> Leili taun ien, seilon ti lawe xux ma nenex, kakaialaha tenen tenen laha paxai kakapitini tupualalu ma laha halini tihinialalu.

<sup>10</sup> Teka seilon ti tehu pon ie laha amuke hawane matealalu. Ti amuamuaialaha laha aile angiai lalap ma laha he axiax soxi. Laha amuam hawane nake huhua kuluiiai kakai Haeu ti axialaha kawatan, lalu ape maten.

<sup>11</sup> Tuahe muhi ngain tolulu tewaok, hanawai Haeu soh hani leilolalu ape i hamoiha aliake lalu. Ti lalu tule, hatesol seilon ox tuhi hawane laha ti waliko laha papaxai.

<sup>12</sup> Muhin lalu hong tenen kinax tiloma tesol tone Haeu, "Lua hanima patul." Ape teteka seilon watakaialalu laha papaxai ti lalu luluainiwa he teik maun hani tesol tone Haeu.

<sup>13</sup> Tataen ien wanen, xux nuea eliel. Teik ti huopanim ti lawe waliko leili tehu taon lalap i manan ape 7,000 seilon mat. Teteka laha kuosel ti tenen kawatan ien, ti mataualaha laha haxawa axe Haeu tel pate tuah.

<sup>14</sup> Kawatan huonen ape i tamusuen. Tenen kawatan i luluainima tutuen, sikole ape i tahia.

### *Tehu suhusuh tapeinan*

<sup>15</sup> Ti tel engel tapeinan kuiniwa tehu suhusuhau, kilan kinax tiloma tesol tone Haeu, laha ukek,

"Haeu tel Masiwi ti kaha ma Krais tetel i taloma, lalu sohot Masiwi tapein ti tehu pon ie ape lalu neini lawe seilon lian tehue."

**16** Taen ien tetesol 24 masiwi lato toto he tesol totoan tuah mateiwai Haeu, lato lokuha lakua hani itan ape lotui Haeu.

**17** Lato ukek,  
 “Haeu tel Masiwi tel pohen tapein,  
 tetel ti imat ma aope ie,  
 amite kak kemulik hani o nake ti lalape pohem  
 o hutuiwen neiniai lawe waliko.  
**18** Teteka seilon laha kum lotui o, laha lengeini o  
 tuahe taun ti o leng pahoi lato ape i tahiawen.  
 Aope ie se taun ti o paxai kolongeni woi  
 lawe seilon ti laha matewen.  
 Ape o kahui hasolia

teka unauam ti kuluiai kakaiam,  
 teteka laha haxawa axam ma hatesol seilon tetam  
 kalak axalahala lalap ma na kumahe.  
 Ape o aile halialu tamusuke teteka laha aile ha-  
 halialu  
 lawe waliko ti tehu pon ie.”

**19** Muhiun tehu Ingi Haeu ti tesol tonan i hea ape  
 lawe seilon pon ningahiai tehu lohe kakain tuah  
 ti Haeu xinotiwen kapi teka seilon tetan. Ape usil  
 xepaxep, kuhuh tonuton, xux nuea eliliel ma puli  
 akah lalap tenen pate waiwain i put hahani itan.

## 12

### *Tel hehin ma tok loloma lalap*

**1** Imuh tenen waliko pate lalap ma hahataxin  
 wanen sohotuma tesol tone Haeu. Nga ningahi  
 tel hehin alon pupuxui i ma tehu pangapang hahi-  
 take aen. Teik tahe patun se huopanim huohu  
 kohot.

**2** Tel hehin ien tian hina akaik. I tang aleleke  
 moloan nake sikole i hatakaha tel akaik.

**3** Muhin tenen waliko liai tin pate lalap sohotuma tesol tone Haeu. Nga ningahi tok loloma kakan pate lalap wanen tepanim huohu patun. Tesol patun hina tah ani gol ma huopanim sula.

**4** I xai wakoteni kolohen ape i haputa tenon ti kohot he maun hani itan. I tu mate tel hehin apepeas halekei tel akaik tataen ti na i ahutama.

**5** Ape tel hehin hatakaha tel akaik wawan. Tuahé ti lehe tok loloma lalap tapei tel akaik, laha taxaxeiti i hani Haeu, kapi tehu totoan tuah tetan. Tel akaik ien imuh i tel neiniai lawe seilon ti xux texux texux ma tap tel pon hil pahoian.

**6** Tel hehin ox hani he lohong, tetesol Haeu apeseni haniwen i. Ti ien i aununa leili 1,260 ngain.

**7** Tehu hilehile sohot hahutuia ti tesol tone Haeu. Maikel tel engel ma tesol engel hahitakan lato hilei tok loloma lalap ien ape tok loloma ma tesol tuaun hil pahoi.

**8** Tuahé laha kum pon waxainiai Maikel ma tesol engel hahitakan ape lato usi xaxaweni laha ti tesol tone Haeu.

**9** Tok loloma lalap ien i se Satan, tetel hoi i pupuas ti imat wanen, lokon ti i tanoma hanowi weiko. Lawe i neini hakalala seilon ti ailei saun lialun. Ape muhi tehu hilehile, laha towi ahuti i ma tesol tuaun hani tehu pon itan ie.

**10** Muhin nga hong tenen kinax lalap ti tone Haeu ukek,

“Taun ape i tahiawen ti Haeu awai seilon  
ti lawe waliko lialun.

I kola lalape pohen ma soliae nenein tetan.

Ape Krais, tetel i taloma, i tel Masiwi ti lawe waliko.

- Satan ape laha towi ahutiwen ti tone Haeu.  
 I tel kemuk i tutu mate Haeu suluiai  
 teka kahikahi Krais lawe ngain ma ipong.
- 11** Lato waxaini Satan nake Jises Krais mat ukei  
 kawatan ti lialui woulato.  
 Tin lato waxaini i ti lato kaxi ahuhuti kakai  
 Haeu.
- Ape lato kum nomuhini matealato  
 ti kolai xoxoi namilolato ti Jises Krais.
- 12** Aile ape amuto tetesol toto ti tone Haeu, amua-  
 mua!  
 Tuah lehe ape lialui lawe waliko ti  
 tehu pon itan ma kanitax  
 nake Satan ape i mos haniwen ien.
- Lon pate lialun nake i tioi ka  
 ngainun pate ape kukunun.”
- 13** Ti tok loloma lalap tioiwa ka i laha towi xoini  
 haniwen he tehu pon itan, i usi nimai tetel hehin i  
 hatakaha tel akaik wawan.
- 14** Tuah tel hehin uke hupaun pai houn ape i  
 ngong hani he lohong, tetesol Haeu apesen hani-  
 wen i. Ti tesol ien i auna ti ahang tolulu tewaok  
 ape tok loloma lalap kum pon aile halialuan.
- 15** Imuh tok loloma lalap pusuini hasomu kan  
 lehe i manuke xaxaweni tel hehin.
- 16** Tuah hepekeun huali tel hehin. I kelaia ape  
 kan ti tok loloma pusuiniwa i xiweu hatapo hani  
 leilon.
- 17** Tok loloma lalap lon lialu hawane ti tel hehin.  
 Ape i lua hilei tetesol laha nakuama ti tel hehin.  
 Laha teteka laha hong usiusi nauna ti Haeu ma tu  
 xoxox ti Jises Krais.
- 18** Muhin tok loloma lalap tu ulea ngixi peixux.

# 13

*Tok manihuh tumun kalimen ahutama itax*

<sup>1</sup> Muhin nga ningahi tok manihuh tenen tumun pate kalimen i ahuhutama itax. Patun tepanim huohu ma huopanim sulaun. Patul he tesol su-laun tah ani gol. Ti he patun tehu tehu hina ax tenen i sosoxeni Haeu.

<sup>2</sup> Tanome tok manihuh ien masin tok lepet tu-ahe anele aen masin anele ae ber a awan masin awe laion. Tok loloma lalap axi i poh ma hana i tel masiwi.

<sup>3</sup> Tehu ti pati tok manihuh tehu mahe naxon lalap ti ala i mat tuahe i mahuen. Teka seilon ongake hawane ape kilan ti laha sameni ma hong usi tok manihuh ien.

<sup>4</sup> Laha lotui tok loloma lalap nake i hanawen tok manihuh tel masiwi ape tin laha lotui tok manihuh ien. Laha ukek, “Tap tel ulea kuin i akulai tok manihuh ie. Tap tel po tike i.”

<sup>5</sup> Haeu paxai lioi ti i to tel masiwi leili 42 pangapang. Ape tok manihuh kak hanasanas ma i ukek ka i se Haeu.

<sup>6</sup> I kak saxuti Haeu ma halialu hetekie axan. Tin i kak halialu hetekie tesol tonan ma teka laha toto ien.

<sup>7</sup> I uke poh ti hil tikei seilon ti Haeu. Ape i to tel masiwi ti teka seilon ti lawe xux ma lawe nenex, kakaialaha tenen tenen.

<sup>8</sup> Kilan wanen seilon lotui i, tuahe teka seilon ti Haeu kum aile ukek ien. Laha teteka Haeu tai konginiwen axalaha imat ti i tanomi lawe waliko lehe laha uke tonain kapin ti tap tahi tapoan. Laha uke tenen tonain ien nake ti laha telei tok sipsip uluha, i mat ukei kawatan ti lialui woi seilon.

<sup>9</sup> Na amuto seilon ti hongoi kakain,  
amuto hong matainiwa.

<sup>10</sup> Teteka seilon ti Haeu namiloiwen kane kalabus,  
laha xoti ma kalabusi lato.

Teteka seilon ti Haeu namiloiwen lato mat  
nake ti usiai nauna tetan, laha telei lato.

Aile ape, tu xoxoa kahikahi Krais kalak kawatan  
tunahi amuto.

*Tok manihuh tumun kalimen sohotule hep-ekeun*

<sup>11</sup> Muhin nga ningahi tok manihuh liai tin  
tumun pate kalimen i sohotule leili hepekeun.  
Huohu sulaun he patun masin ti tok sipsip uluha  
tuahe sale kakaian masin ti tok loloma lalap.

<sup>12</sup> I sohot masiwi hanowi totok ti i ahuma itax.  
I puas hahitake axe tok ien. I lungei teka seilon  
lotuiai tok manihuh naxonaun mahuen.

<sup>13</sup> I aile hasohotu waliko tenen lalap tataen  
hamosui ah ti he maun patul hanima tehu pon ie  
ti puli lawe seilon.

<sup>14</sup> Lokon ti i aile tesol waliko lalap ien ti hahitake  
axe totok manihuh i ahutama itax, i neini hakalala  
teka seilon. Ape i lungei laha tanomiai tok mani-  
huh hanowi tanome totok i ahutama itax, totok  
laha hamange ani ngol tuahe i moihi tutuen.

<sup>15</sup> Tok manihuh i sohotule leili hepekeun, i uke  
poh ti axiai hanawain hani hosai tok manihuh i  
ahutama itax lehe i kak uke. Ape tel na i watakai  
lotuiai hosaun, i hani laha telei.

<sup>16</sup> Totok manihuh i sohotule leili hepekeun i  
lungei teka seilon ukei teik kikilam ti he minalaha  
manau ma na kawalah. I lungei seilon tenen  
tenen, teteka axalah lalap ma teka tap axalah,

teteka kilan soxi ma teka tap, teteka unaui seilon ma teka kumahe unaui seilon.

<sup>17</sup> Tap tel pon hangaini ma kahui tenen na waliko, mewenae na i hina teik kikilam ien. Teik kikilam ien se axe totok manihuh i ahutama itax ma tin wexewex ti i kilami axan.

<sup>18</sup> Mewenae seilon aneso i xeu tetenen ie. Tete ka namilolaha xewan, kewak laha nam nexi tenen wexewex ien nake i kikilami axe tel seilon. Wexewex ti kilamiai totok manihuh i ahutama itax se 666.

## 14

### *Tok sipsip uluha ma 144,000 seilon*

<sup>1</sup> Ti nga to paxapax nga ningahi tok sipsip uluha tutu patul he Maunt Saion kapi tesol 144,000 seilon. Hina axe tok sipsip uluha ma axe tel Taman Haeu taian he kawalato.

<sup>2</sup> Ape nga hong tenen kinax ti tone Haeu masin tangiai tainiai mau ma tonui kuhuh. Tangian masin wanen na kilan seilon xaxai harp.

<sup>3</sup> Tesol 144,000 seilon ien lato tu papakui tenen pak haun mateiwai tehu totoan tuah ti Haeu ma tetesol hinalo seilon hetekie tetesol 24 masiwi. Tap tel seilon liai pon pakuan, mewenae tesol 144,000 ien, tetesol Haeu awaiwen lehe lato sohot seilon tetan ti leili teka seilon ti tehu pon ie.

<sup>4</sup> Lato tetesol lato hani hatapo tupualato usiai nauna ti Haeu ma aile hawanei pupuasan. Haeu kahui ahutiwen lato ti lialui woulato leili teka seilon liai ti tehu pon ie. Lato masin waliko tenen solian tapein ti pahalahaha hani Haeu ma tok sipsip uluha. Lato halini puki lato ti ailei tuahe tenen na waliko lialun ape alomeni tupualato ailei lawe

waliko ti Haeu pahan. Lato kahiti tok sipsip uluha tesol tesol na i neini lato.

<sup>5</sup> Tap wanen lato po puputa. Tap tel pon tienialato ti tuahe na tenen.

### *Tolu engel*

<sup>6</sup> Imuh nga ningahi tel engel liai ngongong patul he maun. I kaxi ahuhuti meng solian ti Haeu tenen tap tahi sohiaian hani teka seilon ti lawe xux ma nenex, kakaialaha tenen tenen ti tehu pon ie.

<sup>7</sup> I kak eliel ukek, “Kolawa lomuto haniwa Haeu ma haxawawa axan nake taun i xohiwen ti i paxai kolongeni woi lawe seilon ma i axi kawatan hani teka seilon lialun. Lotu sameniwa i, tel i tanomi maun aheah, tehu pon itan, kanitax ma lawe kan ti tehu pon ie.”

<sup>8</sup> Muhih nga ningahi tel engel usian. I kak ukek, “Babilon, tehu taon lalap i manan lialuen. Lehe ape lialui teka seilon ti Babilon! Laha neini hakalala seilon ti xux texux texux ti husele lialui woulaha.”

<sup>9-10</sup> Muhih nga ningahi ulea tel engel liai i kak eliel ukek, “Teka laha lolotui totok manihuh tumun kalimen i ahutama itax hetekie tok hosau ma laha uke kikilam tetan he min manau ma na he kawalaha, ti lialui loi Haeu i lengeini laha ape i axi laha kawatan. Laha ilameni moloan pate lalap nake laha lua leili ah ti hina salfa, waliko tenen poun i telei seilon. Tenen ien i sohot ti puli teka engel ti Haeu ma tok sipsip uluha.

<sup>11</sup> Tehot ah ti luialaha tap tahi pehoan. Tap wanen hahei moloan hani teteka laha lolotui tok manihuh ien hetekie tok hosau ma laha uke kikilam tetan.”

<sup>12</sup> Aile ape, teteka ti amuto hong usiusi nauna ti Haeu, tu xoxoa kahikahi Krais kalak kawatan tenen tenen tunahi amuto.

<sup>13</sup> Imuh nga hong tenen kinax ti tone Haeu i kak ukek, “Tai kewak, tataen ie ahua, tanusik teteka seilon laha mat ti laha unaui Haeu tel Masiwi.”

Ape Holi Spirit kak ukek, “Salan wanen. Pake laha uke hanawain solian kahi puasain ma kawatan ti laha kau. Haeu paxai tioi soliai pupuasalaha.”

### *Sale hinitiai seilon ti ngain tapeinan*

<sup>14</sup> Imuh nga ningahi tel seilon toto he teik maun papaxaxun. Tanoman masin ka i tel Nati Seilon. He patun teik tah ani gol ma i akekeni tea pole pate angian.

<sup>15</sup> Muhi tel engel liai sohotuma he tehu Ingi Haeu ti tesol tonan ape i tilol eliel hani tetel i toto he teik maun. I ukek, “Hapuasawa tea pole ape apuhiniwa lawe an ti liai apesenan he tehu pon itan.”

<sup>16</sup> Ape tetel i toto he teik maun i wakoti nami tehu pon ie tea pole ape lawe an ti liai apesenan i apuha.

<sup>17</sup> Muhi tel engel liai ahutama he Ingi Haeu ti tesol tonan. Tin i akekeni tea pole pate angian.

<sup>18</sup> Ape tel engel liai ulea i ahutama he tesol tone waliko ti haniai Haeu. I tel masiwi ngahatiai tehot ah. I tilol eliel hani tetel i akekeni tea pole pate angian, i ukek, “Hapuasawa tea pole koti saluhiae tenen pata greip he tehu pon itan ape apuhiniwa huan nake ape i pamuen.”

<sup>19</sup> Tel engel wakoti tehu pon itan tea pole ti koti apuhiniai huai greip ape i towi greip hani leili

tesol tone pisihaii huai pata. Hunuiai kani greip i kilami lalape lengei Haeu.

<sup>20</sup> Laha pexi hunui huai greip ien melal ti taon lalap. Ape ti laha pepexi, kaka xiweu ahutama. I som hanowi somui mat sai huohu mita ma welui xiwewanai sai 320 kilomita.

## 15

### *Paki Moses ma tok sipsip uluha*

<sup>1</sup> Imuh tenen waliko pate lalap ma tuah wanen sohotuma tesol tone Haeu. Nga ningahi tepanim hua engel ti axiai tepanim huohu kawatan tili i lengei Haeu.

<sup>2</sup> Muhi ngahinga tenen waliko paxaian hanowi kanitax tenen masin kalas i talepalep hanowi xekei ah. Hina seilon tutu ngixi kanitax ien. Lato tetesol lato waxainiwen tok manihuh tumun kalimen i ahutama itax ma tok hosau ma lato tai uke kikilam tetan. Lato akekeni tesol harp ti Haeu haniwen lato wexoiai tangiai pak.

<sup>3</sup> Ape lato papakui tenen paki Moses tel unaui Haeu ma tok sipsip uluha i ukek,  
“Tel Masiwi Haeu tel pohen tapein,  
soliae lalape pupuasam.

Tel Masiwi ti hatesol seilon,  
woum, kakaiam ma pupuasam  
lawe sawisawin ma salan.

<sup>4</sup> Lehe aita tel na tap lon tetam?

Lehe aita tel na kum haxawa axam?  
Mewenae o tetel sawisawin tapein.

Hatesol seilon lotu sameni o  
nake laha ningahiwen sawisawiai  
pupuasam.”

*Tepanim huohu kapi hetekie tepanim huohu kawatan*

<sup>5</sup> Muhin Ingi Haeu ti tesol tonan i hea ape nga ningahi tesol Pate Tuah ti Haeu.

<sup>6</sup> Tesol tepanim hua engel ti axiai tepanim huohu kawatan lato sohotuma leili Ingi Haeu. Puxuaulato papaxaxun ma i talehaleh. Patanawalato tahaian teik tah ani gol.

<sup>7</sup> Kakanua, tel ti tetesol hinalo seilon ien hani tesol tepanim huhua engel tepanim huohu kapi ani gol. Waliko ti leilon i kikilami lengei Haeu, tel tap tahi matean.

<sup>8</sup> Ape axuan i xuh tesol Pate Tuah ti leili Ingi Haeu. I kola ka Haeu tel pate pohen ma axan lalap. Tap tel i soh uke hani ien atengi tataen tepanim huhua engel axi hatapoa tesol tepanim huohu kawatan.

## 16

*Tesol engel xingini tepanim huohu kapi*

<sup>1</sup> Muhin nga hong tenen kinax lalap ahuma tehu Ingi Haeu, i kakane tesol tepanim huhua engel ukek, “Lua tihawa lialui loi Haeu he tesol tepanim huohu kapi haniwa tehu pon itan.”

<sup>2</sup> Ti tel engel imat lua tihawa lohe tehu kapieun haniwa tehu pon itan, naxon tenen pate lialun ma moloan i tan hani tetesol lato hina kikilam ti tok manihuh tumun kalimen ma lolotui hosau.

<sup>3</sup> Ti tel engel usian tihawa lohe tehu kapieun haniwa itax, kanitax kolita hani kaka tenen ati polun a patoto ape lawe waliko moihin leili kan-itax laha mat.

<sup>4</sup> Ti tel engel liai tihawa lohe tehu kapieun haniwa lawe kan ti unum ti tehu pon itan, lawe kan kolita hani kaka.

<sup>5</sup> Ape nga hong tel engel masiwi ngahatiai lawe kan ti tehu pon itan ukek,

“Haeu, tel sawisawin tapein, o hoi liai ti imat ma aope.

Haniai tesol kawatan ie se sawisawin nake paxai kolongenian tetam ti woi seilon se sawisawin.

<sup>6</sup> Teka seilon lialun teleiwen tesol kuluiai kakaiam ma seilon tetam liai.

Ti matealato kakaulato kukumim hawane, aile ape Haeu hamakaka lawe kan ti unum kahi tesol teletele ien.”

<sup>7</sup> Lokon ien nga hong tenen kinax wixima tesol tone waliko ti haniai Haeu, i ukek,

“Haeu tel Masiwi tel pohen tapein, salan wanen ka paxai kolongenian tetam ti woi seilon se sawisawin.

Aile ape tesol kawatan o hahani ie se sawisawin.”

<sup>8</sup> Muhin tel engel liai tihlohe tehu kapieun hani he puli al ti hakekeian lehe i mani hawane seilon ti kuiiai kekeiaan.

<sup>9</sup> Ti laha lulua he kekei alon, laha to kak sasaxuti Haeu, tel Masiwi haniai tesol kawatan ien. Tin laha kum towiahu ti lialui woulaha ma laha kum haxawa lalape axan.

<sup>10</sup> Ti tel engel liai tihawa lohe tehu kapieun haniwa tehu totoan tuah ti tok manihu tumuñ kalimen i ahuma itax, tilokoan atuhi hahutuia i ma teka seilon i neneini ape ti lalape moloan laha atalahi hamekimeki nisulaha.

**11** Laha kak saxuti tatale Haeu tel Masiwi nake ti lalape moloi naxon he tinulaha. Tuahe tin laha kum nam tahane lialui woulaha ma laha tale tutuen tehitolaha hani Haeu.

**12** Ti tel engel liai tihija lohe tehu kapieun haniwa tehu kan axan Epratis, i nun paxe apesenai aweisali tesol masiwi ti angiba.

**13** Muhiin nga ningahi tolu spirit lialun lato tanome kek tenen lalap. Lato tit ahuhutama he awe tok loloma lalap, tok manihuh tumun kalimben ma tok unauan pupuas hahitakan, totok i sohotule leili hepekeun.

**14** Tetesol spirit ien lawe lato ailele waliko tenen lalap ti neini hakalalai seilon ape lato lua hani tesol tesol apuhiniai teka masiwi ti lawe xux ti tehu hilehile. I sohot ti ngain lalap ti Haeu tel pohen tapein ti i hiniti lawe seilon.

**15** Tataen ien Jises tel Masiwi kak ukek, “Hong matainiwa! Tahiaiak seilon kum amemene masin tel seilon ti xuxuina! Amuam hani teteke lawe taun laha mon atetengi tahiaiak. Laha masin tel seilon tenen puxuaun mewenae apesenan lehe i kum tunahi hienain ti uke na laha paxai i makahul.”

**16** Ape tetesol spirit lialun apuhini teka masiwi kane tehu hilehile hani tesol ti kakai Hibru laha axai *Amagedon*.

**17** Ti tel engel tapeinan tihija lohe tehu kapieun haniwa he maun, tenen kinax lalap wixima ti tehu totoan tuah ti Haeu leili Ingan. I ukek, “Ape i tilawen.”

**18** Tataen ien usil xepaxep, muhuhui kuhuh i tonuton hahawane ma xux nuea eliel. Lalape

tehu nueai xux ien i tai sosohot lilian ti uli seilon nakuama.

<sup>19</sup> Teka taon ti lawe xux manan. Babilon tehu taon lalap, i kelaia uke he tolunon. Haeu tai maluhe lialui woi teka Babilon ape i hani laha an wakin ti kolai lalape lengean.

<sup>20</sup> Ape lawe xux ti itax hutoma kaluta ma lawe maunten matit manah.

<sup>21</sup> Lalape puli akah putalih he maun tuhuke pexi teka seilon. Tesol puli akah ien pate waiwain a kawate tehu tehu i mei kewa sai 50 kilo. Ape ti lalape lialui kawatan ien, teka seilon to kak sasaxuti Haeu.

## 17

### *Tel hehin ma totok manihuh tumun kalimen ti i ahutama itax*

<sup>1</sup> Imuh, tel ti tepanim huhua engel lato tihi tepanim huohu kapi, i nahih hani kapik ape i ukek, “Kahitima nga. Nga kola hani o sale Haeu axi kawatan hani tel hehin axan lalap ti ailei saun lialun i tu kikilami tehu taon lalap xohixohin kapi tesol kan tenen i kikiliwau.

<sup>2</sup> Teka masiwi ti xux texux texux laha akati tel hehin ien ailei lawe waliko ti Haeu watakai. Ape teka seilon liai ti tehu pon ie laha hana hatapo tupualaha ailei saun lialun ien nake ti xoxoi isiai pahahaha.”

<sup>3</sup> Muhin tel engel kapiti namilok lehe nga ningahi waliko ti i sosohot he lohong. Ti ien tel hehin heihoi tok manihuh kakan tumun kalimen, totok i ahutama itax. Patun tepanim huohu ma huopanim sulaun. Hatehu tupuan hina ax taian tenen i sosoxeni Haeu.

**4** Tel hehin pupuxui puxux tenen kakai xewan ma kakai ati polun. Paxaian solian wanen. He tinun hina pis ani gol ma hat tenen pate tuah. I akekeni tehu kapi ani gol tuahe leilon xuhai waliko pate lialun masin waliko tenen kohan. I kola lalape lialui woi tel hehin ien.

**5** He kawan hina kakain i kikilami lialui pupuasan, i ukek,

“Nga se Babilon tehu taon lalap.

Nga tel tini teka weli ailei saun lialun  
ma lawe waliko ti Haeu watakai hawane seilon  
aile.”

**6** Tel hehin ien amuke hawane ti laha telei teka seilon ti Haeu, teteka lato tu xoxox ti usiai woi Jises. Paxaiai tel hehin masin tel seilon ti i un taxitaxiawen. Nga ong mamata hawane ti nga ningahiwa saun tenen ien.

**7** Tel engel kakane nga ukek, “Kum nam tataxini. Nga kaxi haxewa hani o sale pupuase tel hehin ma tok manihuh i heihon, totok patun tepanim huohu a huopanim sulaun.

**8** Tok manihuh tumun kalimen ien ti o ningahi, i kumahe moihin aope ie. Ti imat i moihin ape imuh tin i moih alia. I sohotule leili tewau wal pate walawalan wanen. Tuahe ti tapeinan Haeu telei tamusuke i. Kilan seilon laha ongake hawane taen ti laha paxaiwa tok manihuh ien. Laha se teteka seilon Haeu kum tai kongini axalahi lilian ti tanomiai lawe waliko lehe laha kum uke tonain kapin ti tap tahi tapoan. Laha ongake hawane nake kemuk tok manihuh ien moihin, muhin i mat ape i moih alia uleawen.

**9** “Mewenae seilon aneso i xeu sale tetenen ie. Tesol tepanim huohu pati tok manihuh ien i kik-

ilami tepanim huohu maunten ti tehu taon lalap, tetesol ti tel hehin neneini seilon. Tetesol patun tin i kikilami tepanim hua masiwi.

<sup>10</sup> Tepanim ti lato laha hatapoen ti masiwi, tel toto tutuen masiwi ma tel ulea i po sohot masiwi tuahe nenein tetan teik kukunun.

<sup>11</sup> Totok manihuh kemuk i moihin tuahe aope i maten, i tin se masiwi masin tepanim huhua liai ape imuh i to ulea masiwi. Tuahe ti tapeinan Haeu telei tamusuke i.

<sup>12</sup> Tesol huopanim sulaun o ningahi, i kikilami huopanim masiwi tuahe lato tai hutui nenein ti lato. Taen ti lato ukewa tonain ti masiwi, nenein ti lato kapi tok manihuh tumun kalimen tuahe ti teik taun kukunun.

<sup>13</sup> Lato neneini seilon hetekie namil teikawe ma lato hong usi hawane tok manihuh tumun kalimen.

<sup>14</sup> Lato hil pahoi tok sipsip uluha tuahe tok sipsip hetekie teka seilon tetan, teteka unauan wanen ti i kilamiwen, lato waxaini tetesol masiwi ien ma tok manihuh tumun kalimen. Lato waxaini tehu hile nake tok sipsip uluha i se Masiwi ti lawe masiwi, i Masiwi tapein ti neiniai lawe masiwi.”

<sup>15</sup> Tin tel engel kakane nga ukek, “Tetesol kan ti tel hehin ailei saun lialun toto, i kikilami seilon ti lawe xux kakaialaha tenen tenen.

<sup>16</sup> Tok manihuh tumun kalimen ma tetesol masiwi ti teka sula tu kikilami, imuh lato watakai ma pahoxai tel hehin ailei saun lialun. Lato waxi lungsei hatapo soxian ape i makahul wanen ti lawe waliko. Lato aile halialu tamusuke i masin na oha nimai anan. Ape lato towi i hani he ah.

<sup>17</sup> I sohot ukek usiwa namili Haeu. I hani tok manihuh tumun kalimen to masiwi atengi tataen

hatesol kakaian sohot ponowiwa.

<sup>18</sup> Tel hehin o ningahi i tu kikilami teteka ti  
tehu taon lalap laha neneini teka masiwi ti tehu  
pon ie.”

## 18

### *Sale mananai Babilon*

<sup>1</sup> Muhin nga ningahi tel engel liai momosulih tone Haeu. I pate pohen ma lalape xewaien haxewa hawane tehu pon itan ie.

<sup>2</sup> I ausini eliel hawane,  
“Babilon tehu taon lalap i manan lialuen.  
Malehe ape lialui teka seilon ti Babilon!  
Tehu taon ien sohot tetesol ti kilai spirit lialun  
ma manixux tupuxa tetenen hahalin ti seilon  
ani ingai.

<sup>3</sup> Teka Babilon neini hakalala seilon ti xux texux  
texux  
usiai kilai lialui woulato.  
Ape laha hani hatapo tupualaha ailei saun lialun  
ien  
nake ti xoxoi isiai pahahaha.

Teka masiwi ti xux texux texux laha akati teka  
Babilon  
ailei lawe waliko ti Haeu watakai.

Ape teka hangainiai soxi uke hakila hawane moni  
ti hamasamas ti teka Babilon.”

<sup>4</sup> Muhin nga hong tenen kinax liai luainima tone  
Haeu, i ukek,  
“Teka seilon ti Haeu, ahuta saliliwa Babilon  
lehe amuto kum tuai lato ailei saun lialun  
ma amuto kum uke kawatan ti lehe Haeu axi  
lato.

<sup>5</sup> Ti husele lialui woulato i hamanomano loi Haeu  
ape i kum paxai lioi tenen saun ti lato ien.

- 6** Haeu, o aliake haniwa lato  
     masin ti lato aile haniwen teka seilon liai.  
 Haniwa lato kawatan uke he huohu  
     ti waliko lialun lato aile haniwen laha.  
 Haniwa lato an wakin tenen poxan  
     i xoini ti lato haniwen seilon liai.
- 7** Axiwa lato moloan lalap ma aile hatahaneawa  
     lato  
     lapan masin wanen ti lato sameni aliake lato  
 ma amumuke soliai totonalato.  
     Lato hanasanas ukek ka lato to masiwi  
 ma tatahan kum tunahi lato  
     hanowi teka seilon axoalaha matewen.
- 8** Aile ape Haeu axi hulutini lato kawatan,  
     tenen masin matemate, tatahan ma hitolo.  
 Ape Babilon i lua he ah atengi tataen tuahe palong.  
     I sohot ukek nake Haeu tel sulualato se  
     Masiwi tapein.”
- 9** “Tetesol masiwi ti pon itan ie lato tuai teka  
 Babilon ailei saun lialun ma amumuke soliai totonalato,  
     lato tang tahane Babilon ti lato ningahi  
     axui ah tule ti i lulua.
- 10** Lato tu siasia nake sale lalape moloan ti teka  
 Babilon uke, i hamatau lato. Lato eseini ukek,  
     “ ‘Malehe ape lialui teka Babilon!  
     I tehu taon axan lalap  
     tuahe ti teik taun pate kukunun  
     ape lato kewen kawatan.’
- 11** “Teka hangainiai soxi ti tesol tesol laha tang  
     tahane nake tap ulea seilon kahuiai sozialaha.
- 12** Tap wanen seilon kahuiai waliko tenen masin  
     gol, silva, hat tuah, maia pate solian wexoan tenen  
     tenen, pata tuah tenen poun solian ma waliko  
     tenen laha tanomi ani nisi elefen, samen, pata

tenen kahun lalap, brons ma pot tenen pate solian.

<sup>13</sup> Kemuk lato hahangaini waliko ti hanamui an, tesol waliko poun solian masin sanda, mer ma frankinsens, waen, wel, palawa ti an, komem, bulmakau, sipsip, hos ma karis. Lato hangaini hehetekie tataen seilon.

<sup>14</sup> “Aope ie laha kakane teka Babilon, ‘Hatesol waliko solian ti lomuto al ape i tapo tamusuen. Lawe kilai soxi amuto tenen tuah ma kahun lalap ape i tapo kalutawen. Amuto kum pon uke ali-akean.’

<sup>15</sup> “Apeteteka seilon totonalato soli ti hangainiai soxi hani teka Babilon, lato tu siasia nake sale lalape kawatan ti teka Babilon i hamatau lato. Lato tang tahane ukek,

<sup>16</sup> “ ‘Malehe ape lialui teka Babilon!

Kemuk i tehu taon axan lalap.  
Soliai tanoman masin tel hehin

i pupuxui maia wexowexon tenen kahun  
lalap  
ma pis tenen i kamakam ma hat pate tuah.

<sup>17</sup> Tuahe ti teik taun pate kukunun laha  
hamanana hatapo  
kilai soxi amuto!

“Hatesol huniwai waian, teka maho, teka  
kukuoxi laha ma teka laha waxeni totonalaha  
puasain ti itax, tin laha tu siasia.

<sup>18</sup> Ti laha ningahiwa axui ah tule ti Babilon  
lulua, laha kak tang eliliel ukek, ‘Tap tehu taon  
soliaian tetehu ie lilian ti imat hanima aope.’

<sup>19</sup> Laha towi pekeun hani he patulaha kolai  
lalape tatahan. Laha tang kakak tutuen ukek,  
“ ‘Malehe ape lialui teka Babilon!

Kemuk i tehu taon axan lalap.  
 Teka huniwai waian lawe uke halapa moni  
 ti hangaini hanialato soxi.  
 Tuuhe ti teik taun kukunun  
 laha hamanana kalutini hatehu taon.' ”  
**20** Ape tenen kinax ti tone Haeu kak tatale ukek,  
 “Amuto teka ti tone Haeu, amuamua.  
 Teka kuluiai kakaian, teka aposel  
 ma teka seilon ti Haeu liai,  
 amukewa waliko tetenen ien.  
 Haeu ape i kahui aliake hani teka Babilon  
 lawe waliko lialun lato aile haniwen amuto.”  
**21** Muhin nga ningahi tel engel pate pohen akeni  
 lauti tehu pot lalap pate kawatan. I hok towi hani  
 itax ape i ukek,  
 “Xoxoi tehu hokahoka ie pate masin ti  
 Haeu hamanana hawane Babilon  
 ape kaha kum ningahi ulea tehu taon ien.  
**22** Tap kaha po hong ulea tangiai kita, kawakau,  
 suhusuh ma seilon pakupak.  
 Puasain ti tanomiai waliko ma apeseniai an,  
 tin tap i po sohot ulea.  
**23** Hatehu Babilon to leili tilokoan  
 nake tap tenen i hahaxewa leilon.  
 Tap amuamu tenen masin ti salasala  
 i po sohot ulea ien.  
 Haeu hani tesol kawatan ien  
 nake teka hangainiai soxi leili Babilon  
 laha uke ax lalap  
 ti mongohe hamasamas ti teka seilon ti Ba-  
 bilon.  
 Tin kilan teka Babilon lato ailele saun ti pipis  
 ape lato neini hakalala teka seilon ti  
 xux texux texux.

**24** Teka Babilon kau kawatan tenen ien  
 nake lato sa ti teleiai teka kuluiai kakai Haeu  
 ma teka seilon ti Haeu liai ti xux texux texux.”

## 19

### *Kakain ti sameniai Haeu*

**1** Muhin nga hong masin kinaxe seilon kilan ti tesol tone Haeu lato kak eliel ukek,

“Kako haxawawa axe Haeu!

I tel Masiwi ti kaha, tel awaiakaha pate pohen  
 ma solian tapein.

**2** Paxai kolongenian tetan ti woi seilon  
 se salan ma sawisawin.

I axi hawane kawatan hani Babilon  
 nake laha masin tel hehin weli ailei saun  
 lialun.

Laha neini hakalala kilan seilon ti ailei waliko  
 ti Haeu watakai.

I kahui aliakte hani laha nake laha telei teka  
 unauan.”

**3** Lato tilol tuhituhi ukek,

“Kako sameniwa Haeu!

Babilon i lulua nake ti lialui woulaha.  
 Kawatan ien tap tahi tapoan.”

**4** Tetesol 24 masiwi ma tetesol hinalo seilon, lato  
 lokuha lakua hani itan lotuiai Haeu ti i toto he  
 tehu tonain tuah. Lato kak eliel ukek,

“Salan wanen. Kako haxawawa axe Haeu!”

**5** Ape tenen kinax ahuma ti tehu tonain tuah ti  
 tone Haeu, i ukek,

“Hatesol unaui Haeu,

teteka axamuto lalap ma teteka tap axamuto,  
 amuto teteka hina lomuto ti Haeu,  
 sameniwa i.”

**6** Muhin nga hong ulea masin kinaxe seilon kilan. Tangian masin tangiai tainiai mau ma tonui kuhuh. Lato tilol eliel ukek,  
“Kako haxawawa Haeu!

I tel Masiwi ti kako pohen tapein,  
i neini lawe waliko.

**7** Kako mal amuam hawanewa ma  
haxawawa lalape axan!

Tehu ngain lalap ti salai tok sipsip uluha i tahi-awen.

Ape tel hehin lehe i uke axoan apeas tengeniwen  
i.

Tel hehin ien tu kikilami hatesol seilon  
laha soh ti Jises Krais.

**8** I pupuxui maia solian tenen pate papaxaxun  
ma i talehaleh.”

Puxuaun ien i kikilami soliai woi seilon ti  
Haeu.

**9** Ape tel engel kakane nga, “Taiwa tetenen,  
‘Haeu amumuken teka i ilowi hani tehu angiai  
lalap ti salai tok sipsip uluha.’ ” Tin i ukek, “Tesol  
kakain ien se kakain salan i ahuma ti Haeu.”

**10** Ti nga hongoa, nga lokuha lakua hani itan  
lotuian tuahe i kakane nga, “Kum ailele ukek ien!  
Haeu tetel ala o lotui. Nga tuahe unaui Haeu  
masin o ma teka akikikalutti Krais, teteka laha tu  
xoxox usiai kakain salan tetan. Na seilon hong  
auni tenen kakain ien, lawe waliko ti laha kaxi  
ahuhuti se kakain salan i ahuma ti Haeu.”

### *Tel seilon kiliwakei tok hos papaxaxun*

**11** Muhin maun aheah i hea ape nga ningahi  
tok hos papaxaxun ti tone Haeu. Tel kiliwakean  
axan Namil Xoxoan ma Salan. Paxai kolongenian

tetan ti woi seilon ma hilehile tetan pahoiai teka watakaian, se sawisawin.

<sup>12</sup> Pulan kamakam hanowi xekei ah ma kilan tah ani gol he patun. Tenen ax taian he tinun tuahe tap tel i tioi salangawan, mewenae i.

<sup>13</sup> I pupuxui puxux weluwelun a pate kaka. Axan liai tenen Kakai Haeu.

<sup>14</sup> Teka seilon ti hile ti tone Haeu kakahiti i. Tin lato kikiliwake hos papaxaxun. Lato pupuxui maia solian pate papaxaxun tenen i talehaleh.

<sup>15</sup> He awe tel neinialato tea ngol ahutama pate angian i uke ti lehe i waxaini teka watakaian. Nenein tetan hani laha pate ahian. Ti kolai lalape lengei Haeu i aile halialu laha masin tel i towi huai greip hani leili teik pipisih ape pexi hunui kanun.

<sup>16</sup> He tehu puxuaun ma he kasope aen tenen taian ukek:

Tel Masiwi ti lawe masiwi.

Tel Masiwi tapein neiniai lawe masiwi.

<sup>17</sup> Ape nga ningahi tel engel tutu he alon. I tilol hanji teka manixux tenen analaha xixioi teka maten, i ukek, “Ngong apuhama ti tehu angiaiin lalap ti Haeu apezepesi.

<sup>18</sup> Ngongoma ani xixioi masiwi ti xux, masiwi ti teka seilon ti hile, teka hahitakalaha, xixioi hos ma teka kiliwakealaha ma xixioi lawe seilon, teka unaui seilon ma teka kumahe unaui seilon, teka axalahala lalap ma teka tap axalahala.”

<sup>19</sup> Ape nga ningahi tok manihuh tenen tumun pate kalimen i ahutawen ti itax ma teka masiwi ti xux hetekie teka seilon ti hile laha apupuha ti hileiai tel seilon kiliwakei tok hos ma teka seilon tetan ti hile.

**20** Tuuhe tel seilon ien pohi kongini tok manihuh ien hetekie tok manihuh i sohotule leili hepekeun, totok kemuk i aile hasohotu waliko tenen lalap hahitake axe totok manihuh i ahutama itax. Tesol waliko lalap ien i aile ti neini hakalalai seilon, teteka laha uke teik kikilam ti tok manihuh i ahutama itax ma laha lolotui hosaun. Ape ati lalu laha towi hahamoiha hani he ah ti hina salfa, waliko tenen poun i telei seilon.

**21** Hatesol seilon ti lalu ti hile, tel kiliwakei hos uke tea ngol weluwelun i ahutama he awan telei hatapoalato. Ape teka manixux ang xuh hawane xixiolaha.

## 20

### *Satan xinoti konginan ti 1,000 ahang*

**1** Imuh nga ningahi tel engel mosulih ti tone Haeu, tetel Haeu sowini haniwen i heiai mate tewau wal pate walawalan wanen. I akekeni teik sen samen.

**2** Ape i pohi xinoti tok loloma lalap. I se Satan, tetel hoi i pupuas ti imat wanen, lokon ti i tanoma hanowi weiko.

**3** Tel engel towi xoini i hani leili tewau wal pate walawalan lehe i kum pon puluti ulea teka seilon. Tel engel matai kongini tewau wal ape i hana teik papakat ti kolaian ka tap tel seilon pon heian. Satan to leilon ahang 1,000 ape muhin tel engel oxoxi i ti teik taun kukunun.

**4** Ape nga ningahi tesol totoan tuah. Teka seilon toto ien Haeu hana lato masiwi ti hinitiai seilon. Nga paxai tioi ka lato tetesol kemuk laha telei nake lato tu xoxox kahikahi Krais ma kaxi ahuhuti kakai Haeu. Lato tai lotui totok manihuh

i ahutama itax ma na hosaun. Tin lato tai uke kik-ilam tetan he kawalato ma na he minalato. Lato moih alia ape lato sohot masiwi neiniai seilon kapi Krais ti 1,000 ahang.

<sup>5</sup> Ien se uli moihi seilon. Teka maten liai laha kum xahat atengi tataen 1,000 ahang tamusua.

<sup>6</sup> Amuam lalap hani tetesol unaui Haeu lato moih aliamu imat. Tenen kawatan ti luai leili ah ti tap tahi pehoan i kum tunahi lato. Lato aile hatapo waliko ti Haeu ma Krais kilami haniwen lato ma aweisalulato hani Haeu mewenae hean. Ape lato neini seilon kapi Krais ti 1,000 ahang.

### *Tapoi Satan*

<sup>7</sup> Ti 1,000 ahang tamusua, tel engel oxoxi Satan ti tewau wal pate walawalan.

<sup>8</sup> Ape Satan puluti tatale teka seilon ti lawe xux. Laha axai teka seilon ien Gog ma Magog. I apuhini apeseni laha ti tehu hilehile lalap. Kilaialaha masin puli hepekeun, kaha kum wexe uke.

<sup>9</sup> Laha luama tesol tesol kaliniai tehu taon Haeu waheni, tetehu ti teka seilon tetan toto. Tuah ah ahulih ti tone Haeu ape i lui telei laha.

<sup>10</sup> Ape laha towi xoini Satan tel pulutiai seilon hani leili ah ti hina salfa, waliko tenen poun i telei seilon. Ien tetesol ti laha towiwen totok manihuh i ahutama itax ma totok manihuh i sohotule leili hepekeun. Ape lawe ngain ma ipong lato lamani moloan tenen tap tahi tapoan.

### *Tau nti Haeu hiniti seilon*

<sup>11</sup> Muhin nga ningahi Haeu toto he tehu totoan pate tuah a papaxaxun. Ti lehe i hiniti seilon, ape tehu pon itan ma maun aheah i man kaluta huluta lian tehue.

<sup>12</sup> Nga ningahi teka laha matewen, teteka axalaha lalap ma teka tap axalaha, laha tutu mateiwai tehu totoan tuah. Ape teka engel hei tesol pepa hina woi hatesol seilon. Muhin lato hei teik pepa liai hina axe teka seilon ukei tonain kapi Haeu ti tap tahi tapoan. Ape Haeu hiniti hatesol seilon usiwa saun ti laha ailewen, taian leili tesol pepa ien.

<sup>13</sup> Hatesol seilon ti laha matewen, laha tu hahitake hinitian ti Haeu, teteka laha mat ti itax, teka ti leili amal ma teteka ti tesol Hades, tetesol tone teka maten. Tel tel ti laha Haeu paxai kolongeni woulaha ape axi kahulaha usiwa waliko ti laha ailewen.

<sup>14</sup> Ape Haeu aile halialu tamusuke pohe matemate ma tesol tone teka maten. Teka ti Haeu paxai ukek laha seilon pate lialun, laha kau kawatan leili ah ti tap tahi pehoan.

<sup>15</sup> Hatesol seilon ti tap axalaha leili teik pepa ukei tonain kapi Haeu ti tap tahi tapoan, i towi laha hani tehot ah ien.

## 21

### *Tehu Jerusalem haun*

<sup>1</sup> Muhi Haeu hiniti kewa seilon, nga ningahi maun aheah ma tehu pon itan haun nake ti imat ati lalu kalutawen hetekie lawe kanitax.

<sup>2</sup> Ape nga ningahi tehu taon ti Haeu, i ape tehu Jerusalem haun. I mosulih ti tone Haeu. Soliai tanoman masin tel hehin i apepeas ti tehu salaian.

<sup>3</sup> Ape tenen kinax ahuma ti tehu totoan tuah ti tone Haeu, i kak eliel ukek, “Hongoa! Tataen ie ahua, Haeu aile tonan kapi teka seilon tetan ape

i to hamalum kapi laha. I neini laha ape laha pakata xox kapin.

<sup>4</sup> Ape tatahan kum hatangi ulei laha nake Haeu xaxaweni hatapo lawe kawatan. Tap matemate, tap tatahan, tap tangitangi ma tap moloan ulea nake sale totone seilon ti imat ape i tamusuen.”

<sup>5</sup> Ape tetel i toto he tehu totoan tuah ukek, “Nga aile sohi hauni hahatapo lawe waliko.” I kakane nga, “Taiwa tesol kakain ien nake se salan ma pon hawane ti seilon soh.”

<sup>6</sup> Tin i kakane nga ukek, “Ape i tilawen. Nga se Alfa ma Omega, tetel imat ma tetel tapeinan, tetel ti hutuiai ma tiliai lawe waliko. Tel na pahan is hawane nga tel ngahatian, ti soliai ongak nga aile hasolia totunan. Ien masin na tel seilon kinawen paxepaxen ti tel seilon liai neini axi hakila unuman kan ape tinun i xux.

<sup>7</sup> Tesol soliai waliko ien ukean teka laha waxaini saliniai totohong ma saun lialun. Teteka seilon ien, nga ngahati hahawane ape laha sohot natuk wanen.

<sup>8</sup> “Tuahé teka laha mamata ailei pupuasak, teka laha tale tehitolaha hani nga, teka laha to ailele waliko tenen ti hahien, teka teleiai seilon, teka ailei saun lialun ti wawan hehin, teka laha hapuasa apelaha hiliai seilon, teka laha lotui waliko liai kumahe Haeu ma teka seilon ti puputa, laha hatesol kane ah ti hina salfa, waliko tenen poun i telei seilon. Pate tap tahi tapoi kaui kawatan ien.”

<sup>9</sup> Muhin tel ti tesol tepanim huhua engel lato hina tepanim huohu kapi xuhai tepanim huohu tapeini kawatan, i kakane nga ukek, “Kahitima nga lehe nga kola hani o tehu Jerusalem haun, i

kikilami tel hehin i apepeas ti sal hani tok sipsip uluha.”

<sup>10</sup> Tataen ien Holi Spirit kapiti namilok ape tel engel neini nga hani he tehu maunten patul wanen. I kola hani nga Jerusalem, tehu taon ti Haeu, i mosulih tesol tonan.

<sup>11</sup> I xuhai xewai Haeu. I talehaleh masin tehu hat tuah ma talepaian hanowi na alon hokai kanitax.

<sup>12</sup> I hina titieh pate xawaxawan ma tiatian ani pot hetekie huopanim huowau aweing. Ti tewau tewau, tel engel petenian. He kahip ti tesol aweing ien hina axe huopanim huosol nenex ti teka seilon ti Israel.

<sup>13</sup> Toluwau aweing lato sai angiha, toluwau sai tola, toluwau sai haiup ma toluwau sai ahang.

<sup>14</sup> Titieh ti tehu taon, laha atai patul he huopanim huohu pot lalap. Tehu tehu pot hina axe tel tel ti tesol aposel ti tok sipsip uluha.

<sup>15</sup> Tel engel i kaakane nga i akekeni teik pata ani gol ti kolongeniai lape tehu taon, tehu tiehan ma aweingun.

<sup>16</sup> Hahinalopaun ti tehu taon welualato se tene-nawe. Weluan tin masin tiaun. Ti tel engel kolongeniwa lapan, i tunahi ka weluan sai 2,220 kilomita. Tiaun ma xawaian lapan tin masin weluan.

<sup>17</sup> Tin i kolongeni lape tehu tiehan ape i tunahi ka xawaian sai 66 mita. I usi aliake sale kolongenian ti teka seilon ti lokon ien.

<sup>18</sup> Tehu tiehan laha uke ataian tenen pot tuah axan jaspa ma hatehu taon laha uke ataian ma tanomian gol tenen pate xewan masin malewai kalas haun.

**19** Tesol huopanim huohu pot lalap tutuhi tehu titieh ti tehu taon, ti hasoliai tanome tehu tehu laha uke pot tuah tenen tenen. Axe tesol pot tuah ien se jaspa, sapaia, agate, emerald,

**20** oniks, karnelian, krisolit, beril, topas, krisopras, jasint ma ametist.

**21** Tesol huopanim huowau aweingi tehu taon laha uke tanomian hat tenen pate tuah a lalap. Lalape tehu ti tesol hat ien i pon tanomiai tewau ti tesol aweing. Hatesol aweisal leili tehu taon se ani gol, xewaian masin malewai kalas haun.

**22** Nga tai ningah tunah tehu na ingi lotu leili tehu taon ien nake Haeu tel Masiwi pohen tapein ma tok sipsip uluha lalu se ien ti lehe seilon lotui.

**23** Leili taon tap pupuase alon ma pangapang haxewaian nake xewai Haeu i haxewa hawane ien ma tok sipsip uluha se masin xewai alon i haxewa lawe waliko.

**24** Teka seilon ti xux texux texux laha waxa ti xewaialalu ma teka masiwi tenen tenen laha kau kilan soliai soxialaha hani leili tehu taon ma sameni hahawane Haeu.

**25** Tap tahi konginiai tesol aweingi tehu taon nake tap ipongoan.

**26** Hatesol seilon ti tehu pon itan tin laha kau kilan soliai soxialaha ma laha haxawa axe Haeu ma tehu taon tetan.

**27** Hatesol waliko lialun se hahalin leili tehu taon ien. Tap tel ailei waliko tenen ti hahien ma puputa pon soh hani leilon, mewenae teteka seilon axalaha taian leili teik pepai tok sipsip uluha ti ukei tonain kapi Haeu ti tap tahi tapoan.

*Tehu kan tuah i kikilami tonain kapi Haeu*

<sup>1</sup> Imuh tel engel kola hani nga tehu kan i xi-wewema ti tehu totoan tuah ti Haeu ma tok sipsip uluha. I pate xewan ma i talepalep. I se tehu kan tuah i kikilami tonain kapi Haeu ti tap tahi tapoan.

<sup>2</sup> I kikiliwau patalal ti tewau aweisal lalap ti tehu taon ti Haeu. Pape tehu kan hahupaun hina pata tenen i waxeni haweluwelu totone seilon. Lawe i hua tapai pangapang tehu tehu, a kaun haewia seilon hanowi ti marasin.

<sup>3</sup> Tap tenen na waliko ti Haeu watakai i po to leili tehu taon. Tehu totoan tuah ti Haeu ma tok sipsip uluha ien ape teka unaui Haeu lotu sasameni i.

<sup>4</sup> Hina axan taian he kawalato ape tataen ien lato pon paxaiai Haeu.

<sup>5</sup> Tap wanen ipong leili tehu taon. Lato kum hapuasa tenen na kamaialato. Tin tap pupuase kamai alon nake puki Haeu tel Masiwi se haxewa-ialato. Ape nenein ti lato tap tahi tapoan.

<sup>6</sup> Muhin tel engel kakane nga ukek, “Hatesol kakain ie salan wanen. Pon hawane lawe seilon soh. Haeu tel Masiwi, tel i hanamiloa teka kuluiai kakaian, i taloma tel engel tetan kaxi haniai teka unauan waliko ti lehe i sohot.”

*Jises tahiaian ape i xohiwen*

<sup>7</sup> Jises ukek, “Hongoa! Tahiaiak kapimuto i xohi hawanewen. Haeu amuke teteka laha hong tamani kakain taian leili teik pepa ie ti i kakaxi waliko ti i sohot imuh.”

<sup>8</sup> Nga Jon, nga hong ma ningahi tesol waliko ien. Ti nga hong ma paxai kewa, nga lokuha lakua hani itan lotuiai tel engel i kola hani nga tesol waliko ien.

<sup>9</sup> Tuahe i kakane nga, “Kum ailele ukek ien. Haeu tetel ala o lotui. Nga tuahe unauan masin o hetekie teka tuaum kuluiai kakaian ma teka laha hong tamani kakain taian leili teik pepa ie.”

<sup>10</sup> Ape i kak ulea ukek, “Kum pupuluhini meng ti he teik pepa ie nake taun ape i xohiwen ti lawe waliko ti i kakaxi i sohot.

<sup>11</sup> Imat ti tahiai Jises, teka seilon woulaha lialun laha aile aheheke saun lialun. Teteka ailei waliko ti hahien laha sohot lialu hawane. Teka seilon solian laha soli aheahewa. Ape teka laha hana hatapo tupualaha ailei puase Haeu laha xox ahe tatale.”

<sup>12</sup> Jises ukek, “Hongoa! Tahiaiak kapimuto i xohi hawanewen. Nga kahui hapoponowi hani amuto usiwa waliko ti amuto ailewen.

<sup>13</sup> Nga se Alfa ma Omega, tetel imat ma tetel tapeinan, tetel ti hutuiai ma tiliai lawe waliko.”

<sup>14</sup> Haeu amuke teka seilon laha hong tamani nauna tetan. Teteka ien Haeu sowini hani laha soh hani leili taon tetan ma aniai huai pata tenen i waxeni haweluwelu totonalaha.

<sup>15</sup> Melal ti tehu taon ti Haeu, teka seilon pate lialun wanen, teteka laha hapuasa apelaha hiliae seilon, teka ailei saun lialun ti wawan hehin, teka teleiae seilon, teka laha lotui waliko ti kumahe Haeu ma teka laha wangiti saun ti puputa.

<sup>16</sup> Ape Jises kak ulea ukek, “Nga talo tel engel hahitake axak kaxi ahutiai tesol waliko leili teik pepa ie lehe hatesol kahikahik laha tioi hawane. Nga kahi nati David tel Masiwi, nga nakuama tetan. Nga masin tehu kohot towisaian pate xewan.”

<sup>17</sup> Ape Holi Spirit ma teka seilon ti Haeu ukek, “Nahima!” Lawe seilon laha hong soh kakain leili

teik pepa ie, tin laha ukek, “Nahima!” Tel na pahan is hawane Haeu tel ngahatian, nahima ape ti soliaiongan i aile hasolia totone tel seilon ien. Ien masin na tel seilon kinawen paxepaxen ti tel seilon liai neini axi hakila unuman kan ape tinun xux.

<sup>18</sup> Nga Jon, nga hahongo hawane tel tel ti teka laha ridai kakain taian leili teik pepa ie. Na tel i hasea meng liai tenen ti leili teik pepa ie, tin Haeu axi hasea i kawatan ti teik pepa ie kakaxi.

<sup>19</sup> Ape tel na i hatae tuahe tenen na meng leili teik pepa ie, Haeu kapitini tetan lawe waliko solian ti teik pepa ie kakaxi. Na masin ien, Haeu kum sowini hani i soh hani leili tehu taon tetan ma aniai huai pata tenen i waxeni haweluvelu totone seilon.

<sup>20</sup> Jises, tel i ukek ka hatesol kakain leili teik pepa ie se salan, i kak ukek, “Salan, tahiaiak pate ape i xohiwen!”

Jises tel Masiwi, lua hanima kapimite!

<sup>21</sup> Lalape soliai Jises tel Masiwi haniwa amuto teka seilon ti Haeu. Salan wanen.

## KAKAI HAEU

**The New Testament in the Seimat language, The  
Ninigo Islands, Manus Province, Papua New Guinea  
Nupela Testamen long tok ples Seimat, Manus Provins,  
Niugini**

copyright © 2012 Wycliffe Bible Translators, Inc.

Language: Seimat

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-14

---

PDF generated using Haiola and XeLaTeX on 28 Dec 2024 from source files dated 31 Aug 2023

9fa179b2-dd20-5dbd-9745-1fb6d5f9b415